

# 1 Corintios

## *Pablo chënga jacheuayama*

<sup>1</sup> Atše Pablo, ndábioye Bëngbe Bëtsá tbojanchembo Jesucristbe ichmoná jtsemnama, Bëngbe Bëtsá chca yojánbošeyeca, cányiñe chë Jesucristbeyeca catšata Sósteneseftaca,

<sup>2</sup> quem tsbuanácha sëntsabiamná tšëngaftanga chë Corinto bëts puebloca Jesucristbeñe ošbuáchiyëngbiamá; ndëmuanyënga Cristo Jesúsëftaca Bëngbe Bëtsá tojábiama chabe entsanga nye chábioye oservénënga, ndëmuanyënga Bëngbe Bëtsá tojáchembo chabe entsanga chašmotsemnama, chë nye quem luarama enójuabnaye entsanguentsana luarénënga, Bëngbe Utabná Jesucristbioye tmojotšëmbonëngaftaca, Jesucristo nda yomna Bëngbe Utabná y chëngbe Utabná.

<sup>3</sup> Atše sëntsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y tšëngaftangbe ainaniñe tšabe ebionana chašmotsebomnama.

*Bëngbe Bëtsá Jesucristbeyeca tojama tšëngaftanga ba tšabe bendicionënga chašmotsebomnama*

<sup>4</sup> Bëngbe Bëtsá tšëngaftangbiamá sempre sëndbétsatschuanaye, er tšëngaftanga cányiñe mo canyáca Cristo Jesúsëftaca šmómnayeca, Bëngbe Bëtsá tšëngaftangbeñe tojajuabó, tšëngaftangbe tšabiamá.

5 Chca Crísoftaca šmómnayeca, Běngbe Bětsá tojama tšěngaftanga chašmotsebomnama chábensana nyetsca tšabe soyěnga, tšěngaftanga obenana chašmotsebomnama cha jaměse, Běngbe Bětsabe soyěngama jóyebuambayama y chě soyěngama chacmésertama.

6 Chca, ntšamo cbonjanabuayiynacá mo Jesucristbe ndegombre soyěngcá, tšěngaftágnaca inyěngbioye tšabá šmojinyanjé ndegombre soyěnga bétsemnama, chě ntšamo jtsiyenama.

7 Y chca, Běngbe Bětsá chabe entšanga inétsatšatnaye tšabe soyěnguentsana tondaye quecmochatabuáshebena, Běngbe Utabná Jesucristo quem luarentše yochtónyna tescama Běngbe Bětsábeñe jtsošbuáchiyěse chašmojtsobátmaněntscuana.

8 Cha echanjama tšěngaftanga chábeñe corente chašmotsošbuáchema y ainaniñe běts añemo chašmotsebomnama, ndayá tšěngaftangaftaca jamama cha yojuabnacá chaojapochocantscuana; chca, chě Běngbe Utabná Jesucristo nyetsca entšangbiama tšabá o ndoñe tšabá tmonjamama yochjayana te, ndocná chaondobená jayanana tšěngaftanga ndoñe tšabá šmonjama ca.

9 Běngbe Bětsá nyets tempo jtsamana ntšamo tojašebuachenacá, y cha endměna nda tcmojánachembo cányiñe mo canyáca chašmotsemnama chabe Uaquiñá Jesucrísoftaca, Běngbe Utabná.

*Choca ošbuachiyěngbeñe nyetscanga ndoñe cachcá montsanjuabná*

10 Jesucristbeyeca atšbe catšátanga, tša cbont-saimpadana, chë ndayá Bëngbe Utabná Jesucristo nyetsca bëngbiana yomnama, tšëngaftanga nyetscanga cachcá chašmotsejuabnama, y tšëngaftangbeñe ndoñe más báseftanga canye soye y ínÿenga inye soye chamuatsjuabná. Y aíñe šmochtsiyena mo canyáca, nyetscanga cachcá jtsejuabnayëse y cachcá jamama jtsebošëse.

11 Jesucristbeyeca atšbe catšátanga, atše chca sënjayana, er Cloebe yeb-nentšënga šmonjabëuenaye, tšëngaftangbeñe šmojtsepenzentserama.

12 Ntšamo sentsichamcá entsemna ndayá tšëngaftangbentše báseftanga šmojtsichamo: “Atše Páblëbe ustoná sëndmëna ca”; ínÿengna imojtsichamo: “Atšna Apólosbe ustoná sëndmëna ca”; ínÿenga: “Atšna Pédrëbe ustoná sëndmëna ca”, y ínÿengna: “Atšna Cristbe ustoná sëndmëna ca” imojtsichamo.

13 Chca šmojtsamama, jtsóbocanana mo cada básefta ošbuáchiyënga canye Cristo tmojtsebošmncá. ¿Pablo yojamna nda tmojancrucificá tšëngaftangbe tšabiama? ¿O tšëngaftanga uabáinënga šmomna, atše jótšëmbonëse, tšëngaftanga atšbe ústonënga bétsemnama?

14 ¡Bëngbe Bëtsá sëndbëtsatschuanaye atše ndocná tšëngaftanguentšá tijanábayama; nye Crispo y Gáybioye aíñe!

15 Chca, ndocná quenátobena jayanana, atše jótšëmbonëse uabainá cha tojanoquedá ca, mo átšbeñe ošbuáchiyënga cuaftsemncá.

16 Estéfanabe pamillentšëgnaca sënjanëbaye,

pero ndoñe quetsatabouínÿna inÿa tijanábayama.

17 Er Cristo ndoñe chešnatanichmó inÿenga jubáyama, ndayá chë chabe tšabe noticiëngama entšanga jábuayenama. Ndoñe chešnatanichmó chë soyënga jayanama, corente osertana entšangbe soyënga jtsichámëse; chca, entšanga Crístbeñe chamotsošbuáchema, ndoñe chë atšbe osertánanentšana palabrengama, sinó nÿe chë buayenánama, Cristo cruzoca bëngbiana tojanóbanama.

*Crístbeñe yomna Bëngbe Bëtsabe obenana y osertánana*

18 Quem buayenánana, Cristo entšangbiana cruzoca tojanóbanama, chë pochocánënga jtsemnama tmojtsajnëngbioye jtsinÿanana mo ndoñe corente juabna bomnëngbe soy cá; pero bëngbiana, chë Bëngbe Bëtsá nÿetsca tescama šochjátsebacangbiamna, quem buayenánana jtsinÿanÿnayana Bëngbe Bëtsabe obenana.

19 Ntšamo Bëngbe Bëtsá chabe uabemana palabrenguiñe tojanayancá:

Atše chanjama chë tša osertánëngbe osertánana tondayama chaondëtsoservénama;  
y chanjama chë ba soyëngama osertánëngbe osertánana tondayama chaondëtsámanama.

20 ¿Ntsachetšá yojtsámana chë tša osertaná y chë puerta uatsjinÿená tbojayana soyënga? ¿Ntsachetšá yojtsámana chë tša tšabá chë soyëngama juabnayá, morscá, y inÿengaftaca enatsëtsnaye ora chëngbe ayëñjanayá tojayana soyënga? Ndegombre Bëngbe Bëtsá tojinÿanÿé, chë quem luarentša bëts

osertánánaca tmojayana soyënga tondaye yonduámanama.

<sup>21</sup> Bëngbe Bëtsá, nyets osertánana bomná quetsomñecá y puerte tšabá jtsejuabnayëse, ndoñe tonjanalesenciá quem luarentša entšanga cha chamotsábuatmama, chë quem luarentšënga tša osertánënga tmojánayana soyëngama. Chamna, cha tšabá tbojanínynana chábeñe ošbuáchiyënga játsebacana chë bënga fsëndabuayiyná soyëngama, masque ínÿengbioyna mo ndoñe corente juabna bomnabe soycá jtsinÿanana.

<sup>22</sup> Judiënga tša jtsebošana y Bëngbe Bëtsábioye jtsotjanañana bëts soyënga chaomama, chabe obenana jinÿanÿiyama; y ndoñe judiëngna tša jtsenguayana chë puerte osertánëngbe soyënga jtsetatšëmbuama.

<sup>23</sup> Pero bëngna Cristbiana entšanga fsëndabuayiyná, chë ínÿenga tmojanrucificabiana. Quem buayenánana chë judiënga ndoñe tšabá ntjëúenanana. Y ndoñe judiënga mondbëtsejuabnaye chca yomna mo canÿe ndoñe corente juabna bomnabe soycá ca;

<sup>24</sup> pero bëngbiana, nyetscanga Bëngbe Bëtsá chabe entšanga chamotsemnama šojáchembëngbiamna, masque judiënga o ndoñe judiënga, Crístbeñe endmëna nyets Bëngbe Bëtsabe obenana y osertánana;

<sup>25</sup> er ndayá Bëngbe Bëtsá tojanmcá, Cristo cruzoca chaóbanama jalesénciase, banga jtsinÿanana mo canÿe ndoñe corente juabna bomnabe soycá, pero ndegombre endmëna canÿe puerte más osertaná tojama soye, lempe ntšamo entšanga imotatšëmbuama. Y ndayá cha tojamcá masque

bángbioye jtsinĵanana mo canĵe tondaye obenabe soyćá, ndegombre chĕ soye jtsinĵanĵnayana Bĕngbe Bĕtsá puerte más obenana yobomnama, nĵets obenana ntšamo entšanga imobomnama.

26 Jesucrístbeyeca atšbe catšátanga, šmochtsejuabnaye ntšamo yojamnama, Bĕngbe Bĕtsá chabe entšanga chašmotsemnama tcmojánachembo ora. Tšĕngaftangbentše nĵe báseftanga tša osertánĕnga šmojamna, ntšamo chĕ osertánana bomnĕnga imomnama entšanga mondbetsejuabnayćá; y báseftanga šmojamna becá mando atšetanĕnga o uámana pamillentšĕnga.

27 Pero Bĕngbe Bĕtsá, quem luarentše ndoñe tša osertánĕnga tojanabacací, chca, cha jamama chĕ quem luarentša soyĕngama tša osertánĕnga chamotsĕuatjama; y cha, quem luarentše ndobenĕnga tojanabacací, chca, chĕ obenana bomnĕnga chamotsĕuatjama.

28 Bĕngbe Bĕtsá quem luarentšana tojanbocací ndayá tondaye yonduamancá y ndayá ínĵenga imuabotencá; tojanbocací ndayá tondaye yonduamancá, chca, ndayá quem luarentše tša iuamancá tondaye chaondĕtsámanama.

29 Y chca, Bĕngbe Bĕtsabe delante ndocná quenátobena jayanana tša bĕtsá cha yomna ca.

30 Bĕngbe Bĕtsá tojama bĕnga Crísoftaca cánĵiñe mo canĵacá jtsemnĕse chamotsiyenama, y chábeyeca tojama bĕnga chamóyĕngacñama chabe osertánana bomna soyĕnga; chábeyeca tojama bĕnga tšábenga chabe bominĵiñe chamotsemnama, chabe entšanga jtsemnama chamobenama, puerte tšábenga cach Bĕngbe

Bëtsacá, y atsebácanënga chamotsemnana.

<sup>31</sup> Y chca, ntšamo Bëngbe Bëtsabe uabemana palabrënguiñe endayancá: “Nda tojtseboše jayanama cha canÿe uamaná yomna ca, chamna más tšabá cha bontsemna jayanama Bëngbe Utabná puerte uamaná yomna ca.”

## 2

*Ntšamo Pablo Cristo crucificanábiama chënga tojanabuayená*

<sup>1</sup> Pero, Jesucristbeyeca atšbe catsátanga, Bëngbe Bëtsabe ndegombre soyëngama tšëngaftanga jábuayenama sënjána ora, chca sënjanma ndoñe chë uámanëngbe palabrëngaca, ni chë tša osertánëngbe palabrëngaca.

<sup>2</sup> Y tšëngaftangaftaca sënjamna ora, ndoñe quetstëtseboše ñe ndayíñnaca jatsjuabnayana, ndayá ñe Jesucristbeñe, nda bëngbe tšabiama tmojan-crucificá.

<sup>3</sup> Atše tšëngaftangbeñe sënjamna, mo canÿa ba soyënga jamama ndobenacá, y mo canÿa puerte auatjacá y tbojtsengmëmnacá, chabe trabajo jamama ndoñe jobenayama juabnaye causa.

<sup>4</sup> Ntšamo cbonjanëtsëtsná y cbonjanabuayinacá atše sënjanoyebuambá ndoñe chë tša osertánëngbe palabrëngaca, tšëngaftanga jáyënjanama chiñe chašmotsošbuáchema; pero aiñe tcbonjanayëñaná, Bëngbe Bëtsabe Espiritu y chabe obenana tšëngaftanga jinÿanÿiyëse,

<sup>5</sup> chca, tšëngaftanga Bëngbe Bëtsábeñe chašmotsošbuáchema, ndoñe ñe entsangbe osertanánaca, sinó Bëngbe Bëtsabe obenanama.

*Uámana Espíritbeyeca, Bëngbe Bëtsá jamana entsanga cha chamotsábuatmama*

<sup>6</sup> Pero, chë ya tmojashjáchënga Bëngbe Bëtsábeñe puerte jtsošbuáchiyama y chabe soyëngama corente jtsoertánama, chëngbeñe bënga fchandóyebuambaye becá osertánana bomna soyënga. Pero ndoñe quenátsmëna quem luarentša entsanga quem tempo mondbëtsichamo soyënga, ni mora quem luarentse amëndayëngbe soyënga, ndëmuanÿenga ndoñe bën y ndocna obenana bomnënga mochanjëftsoquéda.

<sup>7</sup> Y aíñe, chë bënga fsëndoyebuambná osertánana bomna soyënga endmëna chë Bëngbe Bëtsá quem luarentša entsángbioye baytentscuana ndoñe tonjaninÿanÿé soyënga, y chca, entsanga baytentscuana chë soyënga ndoñe tmonjanábuatmana. Cha yojanjuabná chë soyënga chca yochtsanmënama, quem luare cabá cha ndëma ora, y yojanjuabná, chë soyëngaca bënga mochtsanobena puerte bëtsëtsanga y uámanënga jtsemnana, cháftaca chë nÿetsca tescama yomna tšabe vida jtsebomnama.

<sup>8</sup> Quem Bëngbe Bëtsabe puerte osertánana bomna soyënga endmëna canÿe soye ndayá quem luar-entša amëndayënga ndoñe ntsësertánana, er chënga aíñe matënjanësértase, Bëngbe Utabnábioye chënga ndoñe matmënjancrucificá, Bëngbe Utabná nda puerte bëtsá y uamaná yomna.

<sup>9</sup> Bëngbe Bëtsabe uabemana palabrënguiñe quem Bëngbe Bëtsabe puerte osertánana bomna soyëngama mëntsá endayana:

Cha imobobonshánëngbiama Bëngbe Bëtsá



tojaprontá soyënga,  
ndocná tonjinÿe, ni tonjouena y ni mo tonjajuabó  
ca.

10 Pero Bëngbe Bëtsá quem soyënga chabe Espíritoftaca bënga šojanÿanÿé, er chë Espíritu lempe jtsetatsëmbuana, chë Bëngbe Bëtsabe soyëngama puerte totcá josértama yomna soyëngámnaca.

11 Entšángbeñe ndocná quenátobena jtsetatsëmbuana ndayá entšabe ainaniñe tomnama, sinó nÿe chë entšabe espíritu, chë chábeñe yomná. Cachcá, nÿe Bëngbe Bëtsabe Espíritu jtsetatsëmbuana ndayá Bëngbe Bëtsá tojuabnacá.

12 Y bëngna, Bëngbe Bëtsábiocana Espíritu tmojóyëngacñe, ndoñe canÿe quem luarentša espíritu, chca, bënga chašósertama chë Bëngbe Bëtsá tojama bënga chamotsebomna soyëngama, bëngbe tšabiamana cha jtsejuabnayëse.

13 Bënga chë soyëngama fsëndoyebuambná, ndoñe chë quem luarentša entšángbentsšana tifjuatsjinÿe osertánana bomna palabrëngaca, sinó chë Bëngbe Bëtsabe Espíritu šojabuatambá palabrëngaca. Chca, Bëngbe Bëtsábiocana soyëngama bënga fsëndabuayiyiná, Bëngbe Bëtsabe Espíritbentsšana yóbocana palabrëngaca, chë Uámana Espíritu ainaniñe imobomnéngbioye.

14 Bëngbe Bëtsabe Espíritu ndoñe tondbomná, chabe ainaniñe ndoñe ntjóyëngacñana chë Bëngbe Bëtsabe Espíritbiocana yóbocana soyënga, er chë entšabiamana chë soyënga jtsemnana mo canÿe ndoñe corente juabna bomnabe soyëngcá, y chabosertama cach ndoñe ntsobenana. Chca

endmëna, er entśá jobenayana quem soyëngama jtsetatsëmbuama y josértama, nÿe chabe ainaniñe chë Uámana Espíritu tbojtsájabuachanëse.

<sup>15</sup> Pero nda aíñe chë Espíritu tbojtsebomna jt-sobenana nÿetsca soyënga tśabá jinÿama chaboser-tama, y ndocná chë Espíritu ndoñe tbondbomná ntsoberenana josértana ntśamo chë Espíritu bomná yomnama.

<sup>16</sup> Er Bëngbe Bëtsabe uabemana palabrënguiñe mëntśá endayana: “Ndocná quenátabatma Bëngbe Utabnabe juabna, chábioye jabuátëmbama chaot-sobenama ca.” Pero bënga, chë ośbuáchiyënga, mondobena jajuaboyana ntśamo Cristo yojuab-nacá.

### 3

*Jatrabájama enutanánënga Bëngbe Bëtsá jaserviama*

<sup>1</sup> Pero, Jesucristbeyeca atśbe catśátanga, atśe ndoñe chiyatanobená jóyebuambayama, mo tśëngaftanga chë Uámana Espíritoftaca mandánënga śmojatsmëncá, sinó nÿe cachënga tśabá jtsomñama juabnënga bomna entsangbioycá, mo basetemëngbioycá, Cristbe soyëngama josértama ndobenënga.

<sup>2</sup> Mo canÿe bebmacá, chabe basetémbioye nÿe létšiye jafsiyana y paselo jabmuánama sananga, chë básetema chcana jasama cabá ndoñe ntsoberenana causa, cachcá, atśe cbonjanabuatambá Bëngbe Bëtsabiama nÿe chë más paselo josértama soyëngama, y ndoñe inÿe soyënga más totcá josértama soyënga, er tśëngaftanga ndoñe queśmënjatobena chca

soyëngama josértana. Y ni mora, tsëngaftanga quešmátobena Bëngbe Bëtsabe soyëngama josértana, chë josértana más totcá yomna soyëngama;

<sup>3</sup> er tsëngaftanga cabá šmojtsama, nÿe ntšamo cach tsëngaftanga tsábá jtsomñama tsëngaftangbe juabnënga yomncá. Y tsëngaftanga ínÿengaftaca cabá yapa šmojtsenántšaboše y nÿe ínÿengbioye jayënjanama soyënga šmojtsamëntscuana, tsëngaftanga šmojtsama nÿe ntšamo cach tsëngaftanga tsábá jtsomñama tsëngaftangbe juabnënga yomncá, y chca, tsëngaftanga šmojtsiyena mo chë nÿe quem luarama enójuabnaye entšangcá.

<sup>4</sup> Er canÿa: “Atše Páblëbe ustoná sëndmëna ca”, y ínÿana: “Atše Apólosbe ustoná sëndmëna ca” to-jayana ora, chca jtsamana mo chë nÿe quem luarama enójuabnaye entšangcá.

<sup>5</sup> Tsëngaftanga chca šmojamama, atše šontsemna tsëngaftanga játjayana: ¿Ndayá Apolos yomna? ¿Ndayá Pablo? Chatna co nÿe Bëngbe Bëtsábioye oservénata bondmëna, ndátbeyeca tsëngaftanga Jesucrístbeñe šmojtsošbuaché, y bëndata cada ona fsënjama chë Bëngbe Bëtsá šojanÿanÿé trabajo.

<sup>6</sup> Atšna, mo nda jajañe jénaye cuafjuatbontsacá, tsëngaftangbeñe sënjanbojatsé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguiñe béjaye cuaftsebuešcñacá, enjantrabája cach atše sënjanbojatsé chiñe; pero Bëngbe Bëtsá, ntšamo matatémënga chauájuama endbetsamcá, tojama banga tsëngaftanguentše Jesucrístbeñe chamotsošbuáchema.

<sup>7</sup> Ntšamo, chë jená y chë matënguiñe béjaye buešcñayá ndoñe yapa ntsámanana

chiñe shajuanënga chaóboचना, n̄ye Bëngbe Bëtsá aĩne, cachcá, nda Bëngbe Bëtsabiana entsanga jábuayenama trabajo tojabojatsé y nda chentsana tojáshjango cach trabajuiñe jóntsama, ndoñe ntjamana entsanga Jesucristbeñe chamotsošbuáchema; n̄ye Bëngbe Bëtsá chca jamana.

<sup>8</sup> Chë jená y chë matiñe béjaye buešcjayá cach trabajuiñe jtsentsénana, y chatna mo trabajayatcá jtsámanana; y cada ona juácanana ntšamo chabe trabajo tomncá.

<sup>9</sup> Bëndata fsëndmëna trabájayata Bëngbe Bëtsabiana oservëniñe, y tsëngaftanga šmondmëna mo Bëngbe Bëtsabe jajañcá, ndayentše cha yojtseboše tsabe jaja saná chaóboचना, y šmondmëna mo chë cha yojtsejebuana bëts yebncá.

<sup>10</sup> Er Bëngbe Bëtsá atšbe tsabiama jtsejuabnayëse, chë trabajo šojabonyé, y atše mo can̄ye puerte tsabe jebuanacá, can̄ye yebna ndayiñe chaotsécuatjonama tojapormacá, sënjanbojatsé chë trabajo, Bëngbe Bëtsabe soyëngama tsëngaftangbeñe jábuayenama. Chentsana in̄ya, mo chë in̄ye yebna jebuaná tojabojatsé jajebuama chiñe más jatsjebuama nda tojatontšecá, cach atše sënjanbojatsé trabajuiñe tojanontsé. Pero cada ona botamana chaotsantješna ntšamo chë trabajo yojtsamama.

<sup>11</sup> Mo chë cán̄yabentsana in̄ye trabajayacá, ndoñe ntsobenana chë yebna jajebuama tojanbojatsé cha chë yebna chaotsécuatjonama tojanpormañe in̄ye soye cachcá chaoservema

jatspórmana, cachcá, ndocná chaondëtsabuatambá inye soyënga, nÿe ntšamo Jesucristbe soyënga yomncá aíñe, chë ntšamo atše natsana sënjanabuatambacá.

12 Chë Jesucristbiana más uámana soyënga bu-atëmbayá jtsemnana mo chë castellano, midio y inye uámana soyëngaca yebna jebuanacá; y chë Jesucristbiana nÿe nduámana soyënga bu-atëmbayana mo chë niñëbenga, butšajësha y tëshenjñësheca yebna jebuanacá.

13 Y Cristo chaojësabo te, Bëngbe Bëtsá echanjínÿanÿiye ntšamo cada cánÿabe trabajo yomnama. Cha chë te íñesheca chca echanjínÿanÿiye, y chë íñesheca, Bëngbe Bëtsá echanjinÿe y echanjínÿanÿiye ndaye trabajo cada ona tojamama.

14 Ntšamo cada cánÿabe trabajo yojtsámanama jtsetatšëmbuama Bëngbe Bëtsá chaojinÿe ora, cha chabe trabajo aíñe yojtsámana ca queojayanëse, chë tsabe trabajayá Bëngbe Bëtsábiocana canÿe uacanana soye echanjójyëngacñe, er cha jtsemnana mo canÿe entšacá, nda canÿe yebna tojtsejebuana jtsejuinÿama ndoñe paselo tondmëna soyëngaca.

15 Pero chë te cánÿabe trabajo nÿe batšá yojtsámanama Bëngbe Bëtsá íñesheca chaojinÿanÿese, chora chabe trabajo echántsemna mo chë jtsejuinÿama paselo tomna soyëngaca jebuanabe soyëngcá, chentšana nÿets yebna jtsejuinÿana. Chë jebuaná jtsachana, pero chabe trabajo lempe jobuëtsana. Cachcá, chë Bëngbe Bëtsabiana trabajo tojtsamá, nÿe batšá oservena trabajo, cha echanjobenaye atsbocaná

jtsemnana, masque lempe ntšamo tojamcá tondaye queochaisoquéda.

16 ¿O tšëngaftanga ndoñe šmondétatšëmbo nyetscanga cányiñe Jesucristbeñe ošbuachiyëngcá, mo chë Bëngbe Bëtsabe bëts yebncá šmomnana, y tšëngaftanguentše Bëngbe Bëtsabe Espiritu yomnana?

17 Nderado nda tojama, tšëngaftanga nyetscanga cányiñe Jesucristbeñe ošbuachiyëngcá jtsemnana chaotsopochocama, Bëngbe Bëtsá chábioye bochantsepochóca, er chë Jesucristbeñe ošbuachiyëngcá cányiñe imomnënga, jtsemnana mo chë Bëngbe Bëtsabe bëts yebncá, chabe entšanga nye chábioye jaserviama; y tšëngaftanga chca šmondmëna.

18 Ndocná cachá chaondëtsenoíngña. Nderado nda tšëngaftanguentšá tojtsejuabná cha tša osertaná yomna ca, ntšamo quem luarentša entšanga mondbétsejuabnaye ntšamo canye puerta osertaná inëtsemnana, cha bontsemna jóbemama mo canya ndabiamana quem luarentša entšanga chamuayana cha corente juabna ndbomná yomna ca, chca, ndegombre corente osertaná jtsemnana chaobemana.

19 Er chë quem luarentša entšanga tša osertánënga imotátšëmbo soyënga, Bëngbe Bëtsabe bominyiñe yomna mo chë corente juabna ndbomnabe soyca. Bëngbe Bëtsabe uabemana palabrenguiñe mëntšá endayana: “Bëngbe Bëtsá chë tša osertánënga jáyëñjanana, ndayá cachënga ínÿënga jáingñama tša osertánánaca tmojtsama soyëngaca ca.”

20 Y mëntšánaca endayana: “Bëngbe Utabná

endětatsëmbo chë tša osertánëngbe juabnënga ton-dayama yondoservénama ca.”

<sup>21</sup> Chíyeca, ndocná chaondëtsichamo corente uamaná yomna ca, ndaye entšabe ustoná tomnana, er lempe ntšamo šmobomncá, Crístbeñe ošbuáchiyënga bétsemnana, tšëngaftangbe tšabiama endmëna, y nyetscanga chë tcmojujabuachëngnaca cachcá.

<sup>22</sup> Lempe tšëngaftangbe soye endëtsomñe: ndayá Páblëbeyeca yomncá, Apólosbeyeca, Pédrëbeyeca, ndayá quem luarentše yomncá, ndayá yomncá ainá tcojtsemna ora, tcojóbana ora, ndayá mora yomncá y chë más chcoye yochtsemncánaca.

<sup>23</sup> Y tšëngaftanga Crístbënga šmondmëna, y Cristna Bëngbe Bëtsábia.

## 4

### *Jesucristbe ichmónëngbe trabajo*

<sup>1</sup> Entšanga entsamna bëngbiana jtsejuabnayana bënga fstsemna Cristbe uajabuáchanënga y Bëngbe Bëtsabe soyëngama jtsabuátambayama trabajo bomnënga, chë Bëngbe Bëtsá baytentscuana entšángbioye ndoñe tonjaninÿanÿé, pero mora aiñe tojinÿanÿé soyënga jtsabuátambayama trabajo bomnënga.

<sup>2</sup> Chca, nda canÿe trabajo tojtsebojanÿabiamna, chabe mandayá jtsobátmanana cha aiñe tšabe palabra bomná chaotsemnana.

<sup>3</sup> Atšbe bariëna, tondaye quenatámana, ntšamo tijamcá šmojinÿe y ndoñe tšabá tijama ca šmojayanëse, o inÿe entšanga cachcá tmojayanëse mo canÿe tribunaliñcá. Ni cach atše ndoñe chca quetsátama, jtsetatsëmbuana

ntšamo atšbe trabajuama tijayancá ndegombre tajojtsemnama.

<sup>4</sup> Atšbe ainaniñe ndocna juabna quetsátsbomna atše chašuyanama bacna soye tijama ca, pero chca ndoñe quenátayana, ndegombre Bëngbe Bëtsabe delante ndocna bacna soye ndbomná atše stsemna ca. Er Bëngbe Utabná endmëna nda atšbe trabajo yonýá y nda ndegombre yobena jayanama atše tšabá o ndoñe tšabá tijamama.

<sup>5</sup> Chíyeca, tšëngaftanga ndoñe quecmátamna jinýana y jayanana ínýenga ndoñe tšabá tmonjama ca, chë nýa chama tempo cabá ndóshjanguëntscuana, Bëngbe Utabná chama chaojésabo ora. Cha chaojésabo ora, puerte tšabá echanjínýanýiye chë iytëmencá yomna soyëngama, mo íbetiñe cuaftsemncá, y botamana echanjínýanýiye, mo binýniñcá, ndayá jamama nýe chëngbe ainanoca entšanga tmojajuabocá. Y chora Bëngbe Bëtsá cada entšabiama echanjayana tšabe soyënga, ntšamo tbojtsomerecencá.

<sup>6</sup> Jesucristbeyeca atšbe catšátanga, chë soyëngama tšabá jábuayenamna, atše sënjama ntšamo Apolos y atše tifjatrabájama botamana chašminýama, y chca sënjama tšëngaftangbe tšabiama, ntšamo bëndata tifjamentšana chašmuatsjínýama jtsiyenana nýe ntšamo Bëngbe Bëtsabe uabemana palabrënguiñe iuayancá, y ndocná tšëngaftanguentšá canýe entšabiama chaotsenábotamnaye, y ínýabiama ndoñe tšabá chauátoyebuambnama.

<sup>7</sup> Er, ¿nda chë ínýengbiama más uámanënga tšëngaftanga cmojtsabiamná? ¿Y ndayá šmobomna, Bëngbe Bëtsá ndoñe tmonjatsatá



soye? Y tšëngaftanga chca chašmotsebomnama cha tojanmëse, ¿ndáyeca šmojtšenabotamná mo Bëngbe Bëtsabe tšetana soyënga ndoñe tontsemncá, y nýe cach tšëngaftangbeyeca šmojonýencá?

8 Tšëngaftanga šmojtsejuabná ya lempe ntšamo cmëjbotcá Bëngbe Bëtsábicana šmojtsebomna ca, y lempe ntšamo jtsebošama šmojtsobencánaca ca. Mo reyënga cuaftsemnëngcá cmojtsabiona, bëngbentšana tondaye ntsëjbotcá. Malaye tšëngaftanga mo reyëngcá šmojtsemna, Crísoftaca cánýiñe jtsemándayëse; chca, bëngnaca tšëngaftangaftaca jtsemnama, cánýiñe jtsemándayëse.

9 Atše šontsinýana, bënga chë Cristbe ichmónënga Bëngbe Bëtsá šojábiana mo chë nýetscangbiana más nduamanëngcá, mo chë jóbanama yojtsamna entšangcá. Nýetscanga chë Bëngbe Bëtsá tojábiamënga bëngbioye jtsënyáyana mo ndoñe cachca entšanga fstsemncá; angelënga y entšángnaca cachcá bëngaftaca montsama.

10 Bënga, Cristbiana oservena causa, quem luarentša entšangbiana fsëntsinýna mo corente juabna ndbomnëngcá; chë cuenta, tšëngaftanga šmojtsejuabná Cristbe soyëngama corente osertánënga šmomna ca. Bënga fsëndmëna chë entšangbe bominyiñe ndocna obenana ndbomnënga; y tšëngaftangna šmojtsejuabná puerte obenana bomnënga šmomna ca. Tšëngaftangbioye ínýenga puerte uámanënga y bëtsétsanga jtsabiamnayana, pero chënga bëngbioye jtsëbuayënjana.

11 Y mëntscoñama, bënga šontsabuashebebian

saná, ndayá jofšiyama y entšayá. Entšanga bēngbioye bacá jtsaborlánana, y tondaye yebna queftsátsbomna.

<sup>12</sup> Y bēnga puerte jabuache fsēndētrabája cach bēngbe cucuatšēngaca. Entšanga šojóyanguango ora, Bēngbe Bētsá fchandbétseimpadana cha chaoma chēnga tšabe bendicionēnga chamotsebomnama. Bēnga chamosufrima ínŷenga tmojtsama ora, bēnga chē soye fchandbétsoboyaye.

<sup>13</sup> Inŷenga bēngbiana bacá tmojtsoyebuambná ora, jtsababuánŷeshanēse fsēnduamana jtējuana. Quem luarentša entsangbe bominjīñe bēnga jtsemnana chē puerte nduámanēnga, mo chē quem luarentša basurēshēngcá, chē quem luarentša entsanga tondayama ndoservēnēnga, mo chē quem luarentša tsengacá; y chca endmēna mēntscoñama.

<sup>14</sup> Quem soyēnga ndoñe quecbatēbuabiarná tšēngaftanga chašmotsēuatjama, sinó ndayá jábuayenama mo cach atšbe basēngbioycá, atšbe bonshánēnga.

<sup>15</sup> Er masque tšēngaftanga mallajta abuátambayēnga chašmotsóbomñe, jacúntama ntjobenaycá, Cristbiana chacmotsabuátambama, ndoñe banga quešmátabamna tšēngaftangbiana mo taitangcá, Cristo Jesúsbeñe jtsošbuáchiyama tmojanéjabuachama. Nŷe atše sēndmēna mo taitacá tšēngaftangbiana, mo ošbuachiyēngcá, er atše natsana tcbonjanabuayená chē tšabe noticiēnga Jesucristbiana, y tšēngaftanga chiñe šmontsanošbuaché.

16 Chíyecna, cbontsaimpadana ntšamo atše tija-  
jamcá chašmotsamama.

17 Chama Timoteo tšëngaftangbioye sentsichamná,  
atšbe bonshaná, canýe aíñe tšabe palabra  
bomná; Bëngbe Utabnábeñe tojanošbuachéyeca,  
atše Cristbiama sënjanbuayiyiná ora, mo atšbe  
uaquiñacánaca cha endmëna, ntšamo chabe  
ošbuáchiyana yomnama. Cha echanjama  
tšëngaftanga chašmuatenójuaboma ntšamo  
atše tšëngaftangbeñe tsjoyenama, Crístbeñe  
ošbuachiyacá, ndayama atše nýets tempo  
ošbuáchiyënga sëndbetsabatambaycá nýets luare  
ošbuáchiyënga enefjuanenache.

18 Tšëngaftanguentše báseftanga ya šmojatsjuabná  
puerte uámanënga šmojtsemna ca, er  
šmojtsejuabná atše stsauatja tšëngaftangbioye  
jama jányama ca.

19 Pero Bëngbe Bëtsá chašojalesenciase,  
sentsobátmana betscó tšëngaftangbioye jama  
jányama. As chjinýe ntsache obenana imobomna  
chë Bëngbe Bëtsabe entsangcá jtsiyenama tša  
uámanënga imomna ca juabnayënga, y ndoñe nýe  
ntšamo jayanama imobencá.

20 Er Bëngbe Bëtsá canýe ošbuachiyabe ainaniñe  
tojtsemánda ora, chca jtsinýnana ndoñe nýe  
ntšamo tojtsichámuama, ndayá Bëngbe Bëtsabe  
obenana chábeñe tojtsemnama.

21 ¿Tšëngaftanga ndayá más šmattseboše: atše  
chayá tšëngaftangbioye jaucácanama, o chayá  
tšëngaftangbioye jányama puerte bonshanánaca  
y ntsetsatjaycá tšëngaftanga jauyanama?

## 5

*Ndayá cuanjama canye boyabása shembásaftaca bacna soye amáftaca*

<sup>1</sup> Ndegombre nyets luariñe entsótatsëmbo tsëngaftanguentše yojtsemna canya, shembásaftaca bacna soye amá, y ntšamo cha yojtsamcá puerte bacna soye yojtsemna; ni chë Bëngbe Bëtsábioye nduabuátmënga chca ntsamana: canye entšá cachabe mamamnáftaca bacna soye yojtsama.

<sup>2</sup> Y tsëngaftanga cabá šmojatsjuabná corente tsábenga šmorna ca, masque chca tsëngaftangbeñe yojtsopasánëse. Tsëngaftanga cmontsamna puerte ngménaca jtsemnana, tša uabouana soye cha yojtsama causa. Canye entšá chca tojamáftacna, tsëngaftanga cmontsamna jamana cha ndoñe más tsëngaftangaftaca chaondenútanama mo ošbuachiyacá.

<sup>3</sup> Y atšna, masque tsëngaftangaftaca choca ndoñe quetsátsmëna, atšbe juabna choca tsëngaftangaftaca entsemna; y chca atšbe espíritoca séntsemnayeca, Bëngbe Utabná šojëftsanatšetá mándoca, sënjajuabó y séntsetatsëmbo ntšamo tsëngaftanga cmojtsamnama, chë entšá chca tojamáftaca.

<sup>4</sup> Tsëngaftanga chašmojénefjna ora, chentše atšbe espíritoca tsëngaftangaftaca atše chántsemna, y atšbe espíritu chentše echántsemna Bëngbe Utabná Jesusbe obenánaca.

<sup>5</sup> Y chora tsëngaftanga cmontsamna jamándana chë entšá ya ndoñe más tsëngaftangaftaca mo ošbuachiyacá chaondenútanama, mo Satanasbe cucuatšiñe cha cuafjaboshjoncá, chca, chë quem

entsá nÿe cachá tšabá jtsomñama juabnënga chaot-sopochocama, y chca, Bëngbe Utabná cachiñe chaojésabo ora, chabe espíritu atsbocaná chaot-semnama.

<sup>6</sup> Tšëngaftanga šmojtsejuabná puerte tšábenga y uámanënga šmomna ca, pero šmojtseleséncia canÿa tšëngaftanguentše chca chaotsamama. Chca ndoñe tšabá quenátsmëna. Tšëngaftanga ya šmondétatšëmbo, ntšamo chë nÿe batšá levadura endbama, nÿets arninÿá chauábochema; cachcá, tšëngaftanguentše canÿa tša bacna soye chca tojama ora, nÿetscangbiamana ndoñe tšabe soyënga jóbocnana.

<sup>7</sup> Chíyeca, tšëngaftanga cmontsamna, chca uabouana bacna soye tojamá jtabocnana, cha ya ndoñe más tšëngaftangaftaca mo ošbuachiyacá chaondenútanama; y chora tšëngaftanga šmochántsemna mo tsëm arninÿacá, ndocna levadúraca, chë bacna juabnëngaca ya ndëmandánënga šmojtseñmayeca. Ndegombre tšëngaftanga chca šmondmëna, er Bëngbe Bëtsá tojama tšëngaftanga tsëm vida chašmotseboznama. Bashco fiesta ora, oveshá tmojanóba, Israeloca entsanga perdonánënga chamotsemnama. Cachcá Cristo, mo chë oveshacá, tojanóbana bacna soyënguentshana bënga játsebacama.

<sup>8</sup> Ntšamo chë judiënga chë fiesta ora mondbamcá, nÿets levadura ojamnana cachcá jonÿayana, cachcá, bënga šontsamna jtsajbanana oyenana bacna soyënga ínÿengbiamana jamama jtsebošëse, y ndaye bacna soye jtsamëse, ntšamo tempo imojanamcá. Ntšamo chë judiënga chë fiestiñe nÿe levadúraca ndëpormana tandëse mondbetsesaycá, cachcá, bënga šontsamna

jtsiyenana nÿetsca soyënga ainaniñe ndocna bacna juábnaca jtsamëse, y ndegombre yomncá jtsóyebuambnayëse y jtsamëse.

<sup>9</sup> Chë inÿe atšbe tsbuanáchañe tcbonjáuyana, chë boyabása o shembásaftaca bacna soye amëngaftaca tondayama chašmondëtsencuénta ca.

<sup>10</sup> Y chca ndoñe quetstétseboše jáuyanana nÿa tondayama chašmondëtsoyebuambná nÿetsca chë quem luarentšënga boyabása o shembásaftaca bacna soye amëngaftaca, chë nÿe cachëngbiamana bëtscá soyënga jtsebomnama tša bošëngaftaca y atbëbanëngaftaca, y chë cachëngbe pormana soyënga diosënga yomnama jtsejuabnayëse adorayëngaftaca ca; er nÿa chca jamamna, tšëngaftanga cmattsamna quem luarentšana jéftsebocanana.

<sup>11</sup> Ntšamo chora sënjanayancá endmëna ndayá tondayama ntsencuéntayana, chë Crístbeñe ošbuachiyá yomna ca tojayanáftaca, y boyabása o shembásaftaca bacna soye tojtsama, o nda nÿe cachabiamana bëtscá soyënga jtsebomnama tša tojtseboše, o chë cachabe pormana soyënga diosënga yomnama jtsejuabnayëse tojtsadorana, o yapa tojtsayatsená, o yapa tojtsetmó, o tojtsatbëbana. Chca entšángaftacna, ni mo šmuatjót bema chëngaftaca cánÿiñe jasama.

<sup>12-13</sup> Atše ndoñe quešnátsmëna jayanana chë ndošbuáchiyënga, chë bëngaftaca ndoñe mondbénutananga, aíñe o ndoñe tšabá tmonjamama. Bëngbe Bëtsá echántsemna nda chëngbiamana yochjayana ntšamo tmojamcá tšabá o ndoñe tšabá bëtsemnama, tšëngaftanga

ndoñe. Ndegombre nÿe chë ošbuáchiyënga tšëngaftangaftaca imnénutanangbiamama cmontsamna chca jayanana. Chcasna, šmochjama ntšamo Bëngbe Bëtsabe uabemana palabrënguiñe endayancá: “Tšëngaftanga cmontsamna, chca bacna soye amá tšëngaftangbentsána jtabocnana ca.”

## 6

### *Ošbuáchiyënga jendemándama tojtsemna ora*

<sup>1</sup> Canÿe tšëngaftanguentsá ošbuachiyá inÿe ošbuachiyabiamama canÿe demanda tojtsebomna ora, ¿cha nanjá chë ndošbuáchiyënga mandadëngbioye chë soye chamojandmanama? ¿Ndáyeca chca nanjama, y ndoñe chë Bëngbe Bëtsabe entsángbioye nanjá chabe demanda chamouenama?

<sup>2</sup> Tšëngaftanga ndegombre šmondëtatšëmbo, Bëngbe Bëtsabe entsanga mochjayanama quem luarentša entsangbiamama tšabá o ndoñe tšabá tmonjamama. Y chënga quem luarentša entsangbiamama chca jayanama tmojtsobenëse, ¿ndoñe montsobena más base soyëngama chca jayanama?

<sup>3</sup> Tšëngaftanga ndegombre šmondëtatšëmbo chë angelëngbiámnaca tšabá o ndoñe tšabá tmonjamama bënga mochjayanama. Chcasna, bënga más jtsobenana chë quem luarentše jëftsiyenama soyëngama chca játayanana.

<sup>4</sup> Y chcase, tšëngaftangbeñe chca demandënga chë quem luarentše jëftsiyenama soyëngama tojtsemna ora, ¿ndáyeca šmatjätëbuayana chë

ošbuáchiyëngbiana tondaye tmonsámamana entšanga, chë soyënga chamojandmanama?

<sup>5</sup> Chca sënjayana tšëngaftanga chašmotsëuatjama: ¿O tšëngaftanguentšë ni mo canya yondmëna corente osertaná, ošbuachiyëngbeñe demandënga chaojandmanama?

<sup>6</sup> Pero ndoñe chca: ošbuachiyëngbeñe demandënga tojtsemna ora, mandadëngbioye jana chë soyënga chamojandmanama. Y chca jamana ndošbuáchiyënga mandadëngaftaca.

<sup>7</sup> Y tšëngaftangbeñe nÿe demandënga jájandmanama tojtsemna ora, tšëngaftangbiana ya canye puerte bacna soye jtsemnana. ¿Ndáyeca ndoñe šmattsóboyaye ínÿenga bacá cmojtsaborlana ora? ¿Ndáyeca ndoñe cachcá šmatjonÿaye ínÿenga cmojtsabiatbëbana ora?

<sup>8</sup> Pero cach tšëngaftangaftacna inÿetsá copasana, ínÿengbioye bacá jtsaborlánana y jtsabiatbëbanana, y tšëngaftangcá Crístbeñe ošbuachiyëngbioynaca.

<sup>9</sup> ¿Tšëngaftanga ndoñe šmondétatsëmbo, chë bacna soye amënga Bëngbe Bëtsabe amëndayoye ndoñe mochanjámashënguama? Ndoñe matenoíngñana. Ni chë boyabása o shembásaftaca bacna soye amënga, ni chë cachëngbe pormana soyënga diosënga yomna ca jtsejuabnayëse adórayënga, ni cachëngbe boyá o shema ínÿaftaca íngñayënga, ni chë boyabásënga mo shembasëngcá jtsinÿnama bošënga, ni chë boyabásënga inÿe boyabásëngaftaca bacna soye amënga,

<sup>10</sup> ni chë atbëbanënga, ni chë nÿe cachëngbiana bëtscá soyënga jtsebomnama tša bošënga, ni chë tša tmoyënga, ni chë uayátsenayënga,



ni chë ínÿengbiana bacna soye jtsamëse immétsatbëbanënga, chënga nÿetscanga ndoñe quemochatobenaye Bëngbe Bëtsabe amëndayoye jamashjnama.

<sup>11</sup> Y tempo báseftanga tšëngaftanguentšënga chca šmojamna, pero Bëngbe Bëtsá tšëngaftangbe bacna soyëngama tcmojaperdoná, y chca entsemna mo bebénënga cuaftsemncá; cha tojama tšëngaftanga chabe entšanga chašmotsemnana, nÿe cha chašmotseservénama, y tojama tšëngaftanga mo tšabengcá chabe bominjíñe chašmotsemnana. Lempe chca Bëngbe Bëtsá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espíritu tojamama.

*Bëngbe cuerpo chaotsemna Bëngbe Utabná jt-seservénama*

<sup>12</sup> Mondbëtsichamo: “Atšbiana entselesenciana ndayánaca jamama, ndayama Bëngbe Bëtsá ndocá tonjayana ca.” Pero básefta soyënga jtsamana ndoñe atšbe tšabiana ntsemnana. “Atšbiana entselesenciana ndayánaca jamama ca”, pero ndoñe quichatsleséncia ndaye sóyecnaca nÿets tempo mandaná jatsmënana.

<sup>13</sup> Mëntšánaca mondbëtsichamo: “Saná uafsbiama y uafsbiá saná chaóyëngacñama ca.” Pero Bëngbe Bëtsá canÿe te echanjama chë uta soye chaotsopochocama. Bëngbe Bëtsá entšabiana cuerpo ndoñe tonjanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservema, y Bëngbe Utabná bëngbiana tšabe bendicionënga chaotsamama.

14 Y Bëngbe Bëtsá, nda tojama Bëngbe Utabná cháuatayenama, bëngbiámnaca chabe obenánaca echanjama chámuatayenama.

15 ¿Tšëngaftanga ndoñe šmondétatsëmbo, Crístoftaca cánÿiñe mo canÿacá šmomnana yomna mo tšëngaftangbe cuerpo chabe cuerpentša soye cuaftsemncá? Tšëngaftangbe cuerpo Crístbioye jaserviama endmënayeca, tšëngaftangbe cuerpo jtsemnana mo Cristbe cuerpentša soycá. ¿Ntsámo atše chjátobena atšbe cuérpoca, chë ndayá yomna mo Cristbe cuerpentša soycá, canÿe bacna vida bomna shembásaftaca bacna soye jamana, y chca atšbe cuerpo jabemana mo chë shembásabe cuerpentša soye cuaftsemncá? ¡Ndoñe, ndegombre ndoñe!

16 ¿O tšëngaftanga ndoñe šmondétatsëmbo, canÿe entšá canÿe bacna vida bomna shembásaftaca tbojéninÿena ora, chë útata jóbemana mo canÿacá? Er Bëngbe Bëtsabe uabemana palabreñguiñe boyabása y shembása tbojéninÿenama mëntšá endayana: “Chë útata mo canÿacá bochantsema ca.”

17 Pero canÿe entšá Bëngbe Utabnáftaca cánÿiñe mo canÿacá tojtsemna ora, jtsemnana mo chë útata cach canÿe espíritu tbojtsebmncá.

18 Nÿa ndocna te canÿe boyabása o shembásaftaca bacna soyënga šmattsama. Nderado ndaye inÿe bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamamna, lempe jamana nÿe cachabe cuérpoca, y chë causa, chca

jamëse, cachabe cuerpama más bacna soyënga jtsamana.

<sup>19</sup> ¿Tšëngaftanga ndoñe šmondëtatšëmbo tšëngaftangbe cuerpo yomna mo canÿe yebncá Uámana Espíritbiama, cha tšëngaftangbe ainaniñe chaotsiyenama Bëngbe Bëtsá tojánmayeca? Ndegombre tšëngaftangbe cuerpo ndoñe tšëngaftangbe soye quenátsmëna, sinó Bëngbe Bëtsabe soye.

<sup>20</sup> Chca endmëna, er Cristo bënga játsebacama tojanóbana ora, yojamna mo cha bëtsá cuafjopagacá tšëngaftanga Bëngbe Bëtsábenga chašmotsemnama. Chíyeca, chë tšëngaftangbe cuerpëngaca chašmojtsama soyëngaca šmochtsinÿanÿnaye Bëngbe Bëtsá puerte uamaná y bëtsá bëtsemnama.

## 7

### *Jobouamayama jábuayenama*

<sup>1</sup> Mora chanjóyebuambaye ndayá tšëngaftanga átšbioye šmojuábobemama. Ndegombre, canÿe boyabásabiama más tšabá endmëna ndoñe chaondobouamá.

<sup>2</sup> Pero choca banga boyabása o shembásaftaca bacna soye amënga imojtsemna causa, tšabá entsemna cada boyabása chabe shema chabotsóbonñe, y cada shembása chabe boyá.

<sup>3</sup> Boyábioye bontsemna jamana chabe shembiamama lempe ntšamo jamama ibomncá, boyá bëtsemnama; y chabe shémnaca cachcá chabe boyabiama chaoma.

<sup>4</sup> Chë shembe cuerpo ndoñe nÿe cha cánÿabiama ntsemnana, sinó chabe boyabiámnaca. Cachcá,

chë boyabe cuerpo ndoñe nÿe cha cánÿabiama ntsemnana, sinó chabe shembiámna.

<sup>5</sup> Ni boyá, ni shema ndoñe chabondëtsejuabná jtsenbiátsbuana. Aíñe chca copodena, pero nÿe chë útata chca básefta tescama tbojenóyeunase, Bëngbe Bëtsáftaca jencuéntama jtsentšénama. Pero chentšana chë útata entsamna cachiñe cánÿiñe jtëtsmënana, chca, Satanás ndoñe chaondobená jamama bacna soye chaócochënguama, cachënga jenomándama ndoñe tmontsobena causa.

<sup>6</sup> Atše chca sëntsichamo, tšëngaftanga jábuayenama, ndayá jamama šmojtselesenciana, y chca ndoñe chašmondëtsamama jamëndama.

<sup>7</sup> Y atšbe bariëna, atšbe juabna entsemna malaye nÿetscanga chë soyënguñe mo atšcá šmattsemna. Pero Bëngbe Bëtsá cada ona obenana tbojatšetá tšabe soyënga jamama, Crístbeñe ošbuáchiyënga jujabuáchama, ínÿenga canÿe soyama, ínÿengna ínÿe soyama.

<sup>8</sup> Chë cabá ndbouamnënga y viudanga sëntsëtsëtsná, chëngbiana tšabá yojtsemna ntjobouamaycá joquédana, atšcá.

<sup>9</sup> Pero chca jtsemnama cachënga jenomándama ndoñe tmontsobenëse, chënga entsamna jtsóbouamayana, er más tšabá endmëna jtsóbouamayana, y ndoñe nÿe boyabásabiama o shembásabiama tša nÿets tempo jésejuabnayana.

<sup>10</sup> Pero chë bouamnënga sëntsamënda shema chabe boyábioye ndoñe cachcá chabondetsonÿá. Chca ndoñe nÿe atše quetsatamënda, ndayá cach Bëngbe Utabná.

11 Pero, shema cachcá chabe boyábioye tbojesonÿase, cha bontsemna ntjobouamaycá jtsomñana o chabe boyáftaca cachiñe jtenútanana. Y cachcá, chë boyá ndoñe quebnátsmëna chabe shema cachcá jesonÿayana.

12 Chë ínÿenga chjáuyana, atšbe juabncá y ndoñe Bëngbe Utabnabe soycá, nderado canÿe ošbuachiyá tbojtsebmna canÿe shema Crístbeñe ndošbuachiyá, pero chë shema tojtseboše cháftaca joquédana jtsiyenama, cha chë shémbioye ndoñe cachcá chabondetsonÿá.

13 Nderado canÿe ošbuachiyá tbojtsebmna canÿe boyá Crístbeñe ndošbuachiyá, pero chë boyá tojtseboše cháftaca joquédana jtsiyenama, chë shema ndoñe chaondëtsejuabná cha cachcá jesonÿayana.

14 Er Bëngbe Bëtsá tojama, canÿe shembása ošbuachiyá chabe entšá chaotsemnama, nÿe chábioye chabotseservénama, y chca, chánaca jtsejuabnayana chë shembásabe boyá Crístbeñe ndošbuáchiyabiana mo chabiana oservena entšacá, cha chëngbeñe mo canÿe pamillëcá jatrabájama tojtseboše ora; y cachcá, chë boyá ošbuachiyábeyeca Bëngbe Bëtsá jtsejuabnayana chabe shema Crístbeñe ndošbuáchiyabiana mo chabiana oservena entšacá, cha chëngbeñe mo canÿe pamillëcá jatrabájama tojtseboše ora. Er chca ndoñe tontsemnëse, chë básenga muántsemna ndošbuachiyatbe básenga, Bëngbe Bëtsáftaca tondaye ndbomnënga. Ndoñe chca yondmënayeca, canÿa o nÿets uta bëtšëtsatbe ošbuáchiyama, Bëngbe Bëtsá jtsejuabnayana chë

básengbiana mo chabe entsangcá.

15 Pero chë boyá o shema Crístbeñe ndošbuachiyá cachcá jtsenónyayama tša tojtsebošëse, chca chaboma. Chora, chë ošbuachiyá ndoñe ntsotocánana chë ínÿaftaca cachiñe jtëtenútanama, er Bëngbe Bëtsá tcmojáchembo natjëmbana chašmotsiyenama.

16 Chca šmochjama, er aca shema ħntšamo cattsetátšëmbo, tacuatjobenaye acbe boyá jayëñjanana Crístbeñe chaotsošbuáchema, y chca, atsbocaná chaotsemnana? o aca boyá ħntšamo cattsetátšëmbo, tacuatjobenaye acbe shema jayëñjanana Crístbeñe chaotsošbuáchema, y chca, atsbocaná chaotsemnana?

17 Masque ntšámnaca, cada ona chaotsiyena jtsamëse ntšamo chë Bëngbe Utabná tbojatsetá obenana yomncá, cada ona ndayá jamama Bëngbe Bëtsá tbojachembcá. Chca atše nÿets luare ošbuáchiyënga enefjuanenache sëndbétsamëndaye.

18 Nderado Bëngbe Bëtsá cánÿabioye tbojachembo, y cha ínÿengbeyeca chë más delicadentse base bobachtema tëtšená tojtsemna, ntšamo chë judiënga monduamancá, cha ndoñe chaondëtsenobiamná mo ndoñe judío cuafjatsmëncá; y nderado Bëngbe Bëtsá cánÿabioye tbojachembo, y cha ndoñe chca tëtšená tontsemnëse, cha ndoñe chaondëtsejuabná tëtšená jatsmëñana, ntšamo chë judiënga monduamancá.

19 Er ndayá iuámana, ndoñe quenátsmëna chca tëtšená jtsemnana o ndoñe, ndayá ntšamo Bëngbe Bëtsá yomandacá jtsamana.

20 Cada ona bontsemna jtsiyëñana, ntšamo yo-

joyencá, chabe entšá chaotsemnana Běngbe Bětsá tbojanchembo ora.

<sup>21</sup> Běngbe Bětsá tcmojanchembo ora, nŷets tempo ínŷabiamana oservená cojamněse, chama ndoñe cattsenócochinŷena. Pero nderado tojtsemnana ntšámose jashjáchama ndoñe más chca ntsemnana, cach acbiamana jatrabájama, as chca cochjama.

<sup>22</sup> Er chě nŷe ínŷabiamana nŷets tempo oservená yojamná, Běngbe Bětsá chabe entšá chaotsemnana tbojanchembo ora, cha mora ošbuachiyacá, jtsemnana canŷa ya ndoñe más bacna soyěnga jamama juabněngaca mandaná, sinó Běngbe Utabnabiamana oservená. Cachcá, chě nŷe cachabiamana trabajayá yojamná, Běngbe Bětsá tbojanchembo ora, mora cha nŷets tempo Cristbe oservená jtsemnana.

<sup>23</sup> Cristo běngbiamana tojanóbana ora, yojamna mo cha bětscá cuafjopagacá, běnga Běngbe Bětsabe entšanga chamotsemnana. Ndoñe šmatjaleséncia nŷe entšangbe juabněngaca nŷets tempo mandáněnga chašmotsemnana, y Běngbe Bětsabiamana chacmotsebnětjomba.

<sup>24</sup> Chcasna, Jesucristbeyeca atšbe catšátanga, cada ona bontsemnana Běngbe Bětsáftaca jtsiyeñana, ntšamo yojoyencá Běngbe Bětsá tbojanchembo ora.

<sup>25</sup> Y chě nděbouamna shembásengbiamana, chěnga aíñe o ndoñe yontsamana jobouamayamna, atše chama ndoñe Běngbe Utabnabe canŷe mando quetsátsbomna, pero chanjayana ntšamo atše tsjuabnacá. Běngbe Bětsá atšbe tšabiamana tojanjuabóyeca, entšanga montsobena

jtsejuabnayana aíñe tšabe palabra bomná chiñe atše tsmēnama.

<sup>26</sup> Atše šontsinŷana, entšá ibojtsemna jtsomñana nŷe ntšamo mora yotsomñcá, er bēnga mora montsiyena puerte padecena soyēnguiñe.

<sup>27</sup> Shema tcobomñese, ndoñe cachcá catjēftsonŷaye; y ndoñe tcondbomñesna, ndoñe catjátsēnguaye.

<sup>28</sup> Tcojobouamase, bacna soye ndoñe quecátama; y nderado canŷe tobiaše tojobouamase, cach bacna soye ndoñe quenátama. Pero chē tmojtsobouamangna padecena soyēnguiñe mochanjoyena quem luarentše chamojēftsemnēntscuana, y atše sēntseboše chēnga jujabuáchama chca jatiyenama ndoñe chaondétsamnama.

<sup>29</sup> Jesucrístbeyeca atšbe catšátanga, ntšamo sēntseboše jayanamna mēntšá entsemna: Cristo quem luaroye yochjésabo orscama ya nŷe batšá entsájamna. Chiyeca, morscana y nŷets tempo más chcoye, chē bouamnēnga entsamna jtsiyenana mo ndoñe bouamnēnga tmontsemncá, o mēntšá, entsamna jtsentšénana Bēngbe Bētsabe soyēnguiñe, y ndoñe nŷe chē bouamná bétsemnama tbojtsemna soyēnguiñe.

<sup>30</sup> Cachcá, chē puerte ngménaca tša ošachiyiñe imomnēnga, entsamna jtsiyenana mo ndoñe chca tmontsemncá; y chē puerte oyejuayēnga, chamotsiyena mo ndoñe chca tmontsemncá; chē soyēnga buamnayēnga chamotsiyena mo tondaye chēngbe soye tontsemncá.

<sup>31</sup> Chē quem luarentša soyēngaca jtsiyenama imojtsentšénēnga entsamna jtsiyenana mo ndoñe



chca tmontsamcá, er quem luare ntšamo bēnga mora monduabuatmcá, pronto echanjochnēngo.

<sup>32</sup> Atše sēntseboše tšēngaftanga ndoñe chašmondētsenocochinñenama. Canñe entšá ndoñe bouamná tontsemna ora, jtsobenana jtsentšénana Bēngbe Utabnabe soyēngama jtsejuabnayama, y ntšamo oyejuayá cha jabemama;

<sup>33</sup> pero chē bouamná nñets tempo jtsenócochinñenana quem luarentša soyēngama, jtsiyenama, y ntšamo chabe shema oyejuayá jtsebomnama;

<sup>34</sup> y chca, cha uta soyiñe canñe ora jtsentšénana. Chē ndēbouamna shembása y chē tobiáše bontsobena jtsentšénana Bēngbe Utabnabe soyēnguiñe sempre jtsejuabnayama. Chēnga mondobena jtsentšénana Bēngbe Bētsá jaserviama, ndayá chēngbe cuérpoca y chēngbe espíritoca tmojamama. Pero inñetšá, chē bouamna shembásana, nñets tempo jesenócochinñenana quem luarentše vida jtsebomnama soyēngama, y ntšamo chabe boyá oyejuayá jtsebomnama.

<sup>35</sup> Atše chca cbontsētsētsná tšēngaftangbe tšabiama, y ndoñe jamēndama ba soyēnga jamama ndoñe chašmondētsobenama, ndayá ntšamo tšabá yomncá chašmotsiyenama, y nñe Bēngbe Utabná jtseservénama chašmotsentšénama.

<sup>36</sup> Nderado nda tojtsejuabná chabe uatsētsnaye tobiášeftaca jtsobouamayama ibojtsemna ca, chca jamama chē tobiáše ya bētsá tojtsemnayeca, y chca jamama tša tšabá yojtsemna ca tojtsejuabnase, cha bontsemna jamana ntšamo

tojtseboščá. Chaotsobouamá. Chca tojama ora bacna soye ndoñe ntsamana.

<sup>37</sup> Pero nderado inÿa, tondaye obligaciúnaca tontsemna y lempe ntšamo tojtseboščá cha tojt sobena jamama, cha tšabá tojajuabó y chabe ainaniñe corente tojtsetátšëmbo, ndoñe ntsobouamayana tšabá yomna ca, cha tšabá chca jtsamana.

<sup>38</sup> Chcasna, chë tobiáseftaca tojtsobouamá chana, canÿe tšabe soye jamana; pero chë ndoñe cháftaca tonjobouamá chana, canÿe más tšabe soye jamana.

<sup>39</sup> Chë shembása bouamná jtsotocánana chabe boyáftaca sempre jëftsiyenana, chë boyá vida tojtsebošnëntscuana; pero chë boyá tojóbanëse, cha jtsobenana cachiñe jtobouamayana, nda cha tojtsebošáftaca, pero chca chaoma mo canÿa Bëngbe Utabnáftaca cánÿiñe mo canÿacá quetsomñecá.

<sup>40</sup> Pero atše jayanamna, cha más oyejuayá nántsemna ndoñe tontóbouamase; y sëntsejuabná, átšnaca tsbomna chë Bëngbe Bëtsabe Espiritu chašotsebuayiynama.

## 8

### *Uátšëmbona saná entšangbe pormana soyëngama*

<sup>1</sup> Mora chanjóyebuambaye ndayá tšëngaftanga atše šmojatjama, ndayá jtsesayama, chë tempo ínÿenga cachëngbe pormana soyënga, diosënga yomna ca jtsejuabnayëse jadórama tmojanátšëmbona soyëngama. Bënga mondëtatšëmbo bënga nÿetscanga osertánënga imomnana. Canÿa tbojtsosertana ora, cha nderado nanjájua boye, chca bétsemnana puerta uamaná cha yojtsemna

ca, pero canya, ínÿenga tojtsababuánÿeshana ora, cha jtsobenana chënga becá jujabuáchana.

<sup>2</sup> Nderado nda tojtsejuabná ndegombre canÿe soye yotátšëmbo ca, cabá ndoñe yontsetátšëmbo ndayá jtsetatšëmbuama ibojtsemncá.

<sup>3</sup> Pero nderado nda Bëngbe Bëtsábioye tbojtsebobonshana, Bëngbe Bëtsá chábioye jtsabuatomana mo chabe entšacá.

<sup>4</sup> Y chë tempo ínÿenga cachëngbe pormana soyënga, diosënga yomna ca jtsejuabnayëse jadórama uátšëmbona soyëngamna, atše šcuayana: bënga corente mondétatšëmbo chë chënga imnétsadorana soyënga, diosënga yomna ca jtsejuabnayëse, ndegombre ndoñe dios quemátsmëna y nÿe canya Bëngbe Bëtsá endmëna.

<sup>5</sup> Pero masque celoca y quem luarentše chamomna entšangbiana “diosënga ca” uabáinënga (ntšamo ndegombre endmëncá, banga quem luarentša tsbanánoca obenánaca mondmëna, entšangbiana diosënga ca ubuátmënga, y banga bëts mándoca entšangbiana “utabnënga ca” uabáinënga),

<sup>6</sup> bënga chë ošbuáchiyëngbiamna nÿe canya Bëngbe Bëtsá endmëna, Bëngbe Taitá, ndábentšana nÿetsca soyënga yóbocana, y nÿe nda jtseservénama bënga imoyena. Y nÿe canÿe Utabnánaca endmëna, Jesucristo, ndábeyeca nÿetsca soyënga yomna, y cach bëngnaca imomna.

<sup>7</sup> Pero nÿetsca ošbuáchiyënga ndoñe chca quemátstatsëmbo. Básefta entšanga, Crístbeñe cabá ntsošbuáchiye ora, imojanamana ndaye sanánaca juatšëmbonana, chë chënga imojanjuabná diosënga yojamna ca soyënga jadórama; chënga, chca

uatšëmbonana tmojttesá ora, jtsejuabnayana chca uatšëmbonana bétsemnana, y ainaniñe juabnënga jtsebomnana ndoñe tšabá tmonjamama, chana tmojase causa. Chënga, ndayá tempo imojánamama, ndoñe quemátobena tšëngaftangcá jtsejuabnayana, chcana jasana bacna soye ndoñe yondmëna ca.

<sup>8</sup> Ndegombre, ndayá bënga tmojttesacá ndoñe ntjamana bënga Bëngbe Bëtsábioye más chamu-atobéconama. Bënga Bëngbe Bëtsabe bominyiñe ndoñe quemochátsmëna más tšábenga aíñe tmojttesama; ni ndoñe chcanga, ndoñe tmontsesá causa.

<sup>9</sup> Pero cuedado šmochtsebomna, ndayá jamana yolesenciánama tšëngaftanga corente tšabá šmotatšëmbuama, ndayánaca jatsmana, y chca causa ínÿenga, chë soyënguiñe más batsá ošbuáchiyënga y osertánënga, ntšamo tšëngaftanga šmojtsamcá chamuatsmama, y chentšana, chëngbe ainaniñe juabnënga chamotsebomna y chëngbiyoye chaotsëtsëtsná ndoñe tšabá tmonjama ca.

<sup>10</sup> Er, aca chë soyëngama tatšëmbuá, nderado tcojót'bema jasama canÿe luarentše, canÿe soye ndayama entšanga dios yomna ca jtsejuabnayëse adórayentše, y canÿe Crístbeñe ošbuachiyá tojtsebomna ainaniñe juabnënga ndoñe tšabá tonjamama, chca tojáseyeca, aquëcá chë soyëngama ndoñe yondétatšëmbo causa, y cha nderado chentše cojttesama tcmojinÿëse, chë soye nanjobenaye chábioynaca jañémuana chë saná jasana, chë tempo chë soyëngama tmojanátšëmbona saná.

11 Y chca aca, chë soyëngama ntšamo betatšëmbuama tcojamama, catjama chë Jesucristbeyeca acbe catšata, chë ndoñe corente ošbuachiyá, y ndoñe aquëcá chë soyëngama corente tatšëmbuá, cha pochocaná chaotsemnana, er chabe ainanentše echántsemna juabnënga canye bacna soye tojamama, chë saná tojasama. Chca nderado cányabioye catjama, ndabiana Cristo tojanóbana, cha jatsbocama.

12 Jesucristbeyeca acbe catšatbiana chca bacna soye tcojama ora, chca causa cha canye soye tojama, ndayama chabe juabnënga ainaniñe chabotsatsësná ndoñe chca chaondëtsama ca; y chca, chentšana tša tojesejuabná cha canye bacna soye tojamama, acna canye bacna soye jamana, ndoñe nje chë catšatbiana, ndayá cach Cristbiámnaca.

13 Chiyeca, nderado ndayá atše stsesama, atše tsjama Jesucristbeyeca atšbe catšata chaoma canye soye y chca jamama chabiana canye bacna soye tojtsemnëse, más tšabá nántsemna ndocna te chë soye atše ntjasana, chca, atše ndoñe jatsmama cha canye bacna soyiñe chaótsatšama.

## 9

### *Jesucristbe ichmónëngbe derecho*

1 Ndegombre endmëna, atše ndayánaca jamana stselesenciánama y Moisesbe leyëngaca ndoñe más mandaná sëntsemnana. Cach ndegombre endmëna, atše canye Jesucristbe ichmoná tsmënama y Jesús Bëngbe Utabná tijinyama; y cach tšëngaftanga mora ošbuáchiyënga jtsemnëse,

šmondmëna ndayá tojóbocna Bëngbe Utabnabiamana atšbe trabajuentšana.

<sup>2</sup> Masque ínÿenga atšbiamana ndoñe quematsjuabná atše canÿe Jesucristbe ichmoná tsmëna ca, tšëngaftangbiamna aíñe chca endmëna; er tšëngaftanga Crístbeñe ošbuáchiyënga šmondmënana y Bëngbe Utabnáftaca cánÿiñe mo canÿacá šmondmënana, puerte tšabá šmontsinÿanÿná atše Jesucristbe canÿe ichmoná tsmënana.

<sup>3</sup> Mëntsá chanjayana chë atše ndoñe tšabá tijama ca imojtsichámëngbiamana:

<sup>4</sup> Ndegombre bënga nÿets derecho fsëndëtsóbomñe jtšobátmanana tšëngaftangbentšana, chë tčbojujabuáchëngbentšana, bëngbe trabajuama saná o ndayá jofšiyama chašcuacaredadama.

<sup>5</sup> Y bëngnaca derecho fsëndëtsóbomñe canÿe shema ošbuachiyá jtsebomnana y bëngaftaca cha jëftsbetšana inÿe luaroye fstsajna ora, ntšamo chë Jesucristbe inÿe ichmónënga, Bëngbe Utabnabe catšátanga y Pédrënaca mondbetsamcá.

<sup>6</sup> ¿O nÿe Bernabé y atše šojtsëtocana cabëndatbe cucuátšeca jatrabájana vida jtsebomnana, y ndoñe derecho fsëntsebomna ošbuáchiyënga chašotsacuédanama, Bëngbe Bëtsabiamana trabájayama?

<sup>7</sup> ¿Ndëmua mo canÿe soldadcá tojtsoservená, ndayá tbojtsájabotama cachá nantsatopagana, vida jtsebomnana? Ndocná canÿe jajañe uvas betiyënga ntjájena, chentša uvasëšangá ndoñe ntjuasama. Ndocná oveshënga ntsanÿenana, chë tojabuatëba létšiyentšana ndoñe ntjofšiyama.

<sup>8</sup> Ntšamo atše muentše sentsichamcá ndoñe nye entsangbe juabna quenátsmëna; y Moisesbe leyíñnaca cachcá endayana,

<sup>9</sup> er chabe leyíñe mëntšá endayana: “Aca canye toróftaca shajuana tmojtsatbaná luariñe chacojtsetrabája ora, ndoñe catjuanguëtsenaye ca.” Y chca ndoñe quenátayana Bëngbe Bëtsá nye toronga inétsanÿena ca,

<sup>10</sup> sinó inye más bëts soye; chca endayana ndayá ndegombre bënga, chë Bëngbe Bëtsabiamama soyëngama abuyayinayíñe trabájayënga cha šnetsanÿena ca. Chca tmojanábema bëngbiamama, er chë fshantse arayá y chë meshënga atbanayá, entsamna chca jamana jtsobátmanëse, chë tmojátabe shajuantšana batšá jóyëngacñama.

<sup>11</sup> Y chca, bënga chë tsabe noticiëngama tchojábuaenase, y chca, Bëngbe Bëtsábiocana tsabe bendicionënga chašmotsebomnama bënga tifjama, ndoñe yapa tanandátsmëna tsëngaftanga jótjañana, chë šmombomna soyënguentšana bënga jëftsiyenama chašcuatšatama.

<sup>12</sup> Inÿenga derecho tmojtsebomna tsëngaftanga jótjañana chë šmombomnentsana chašmuacaredadama, tsëngaftangbeñe chëngbe trabajuama, as bënga más derecho fstsebomna chca jamama.

Pero bënga tondaye checbatamëndá, bënga chë derecho bëtsebomnayeca. Chca játamamna, bënga lempe fsëntsoboyá, chca, bënga tondaye ntjátamama, y chë causa entsanga ndoñe chašondétsayaunana, bënga chë tsabe noticiënga fstsabuayiná ora.

<sup>13</sup> Tsëngaftanga šmondétatšëmbo, Bëngbe Bëtsabe

bëts yebnoca trabájayënga Bëngbe Bëtsabiana oservéniñe, mondbóyëngacñe chënga jasama, ndayá entsanga Bëngbe Bëtsá jadórama chabe bëts yebnoye tmojiyëbo sananguentsana. Y chë Bëngbe Bëtsá jadórama soyënga amënga, altaroça, chë juatšëmbonama luarentše, chënga jasana ndayá chentše tmojuátšëmbona soyënguentsana.

<sup>14</sup> Cachcá, Bëngbe Bëtsá tojamandá, chë tšabe noticiënga abuyayinayëngna, vida jtsebomnamna lempe ntšamo tojtsëjabotcá chamóyëngacñe ca, chë tšabe noticiënga abuyayinayama.

<sup>15</sup> Pero atše ndocna te chiyaisemandá ínÿënga chca chašmotsecuedánama, atše chë tšabe noticiënga abuyayinayá bëtsemnama chca derecho tsbómnyeca, y cach ndoñe mora quem soye quechatëbuabiamná, tšëngaftanga ndayánaca atše chašmuatšetama. Atšbiana más tšabá nántsemna jóbana, y ndoñe ntjaleséciana inÿa chaoma atše cach atšbiana oyejuayá ndoñe ntjátsmënama, ínÿëngbentsana soyënga stjóyëngacñe causa.

<sup>16</sup> Atše ndoñe quetsatsjuabná atše canÿe bëts soye stsama ca, chë tšabe noticiënga stsabuayinama, er atše obligaciónaca sëntsemna chca jt-samama, Bëngbe Bëtsá chama šojanchémboyeca. ¡Tša lastemcá atšbiana nántsemna, chë tšabe noticiënga ndoñe sëntsabuyayinase!

<sup>17</sup> Chíyeca, atše chë tšabe noticiënga stsabuayiná nÿe atše chca jamama stsebóseyeca, atšbe uacanana soye ya stsebomna; pero atše chca stjama, y ndoñe tontsemna nÿe atše chca jamama stsebóseyeca, masque chca, atše stsama, ndayá jtsamama Bëngbe Bëtsá šojanbonÿecá.

<sup>18</sup> Y chca, atšbe uacanana soye endmëna atše



oyejuayá jtsemnana chë tšabe noticiënga abuyayinayama, ošbuachiyëngbentšana atše vida jtsebomnama tondaye ntjatoyëngacñëcá; chca, atše tondaye quetsátama chë tšabe noticiënga abuyayinayama tsbomna deréchoca, chë atšbe traba-juentšana vida jtsebomnama.

19 Atše, masque ndocna entšábeyeca nÿets tempo mandaná quetsásmëna, puerte nduamaná sënjobema, mo canÿa nÿets tempo ínÿabeyeca mandaná, nÿetscanga jaserviama, chca, atše chca jtsamëse, jobenayama becá entšanga, ntšamo tojopodecá, jayëñjanama Crístbeñe chamotsošbuáchema.

20 Chë judiëngbiamna atše sënjama chaitsiyena mo chëngcá jtsamëse y jtsejuabnayëse, chca, atše jobenayama chënga jáyëñjanama Crístbeñe chamotsošbuáchema. Y chë Moisesbe léyeca mandánënga imoyenëngbiamna, atše chëngcá sënjobema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyëñjanama Crístbeñe chamotsošbuáchema.

21 Pero chë Moisesbe léyeca ndëmandánënga oyenëngbiamna, atše chëngcá sënjobema, chënga jáyëñjanama Crístbeñe chamotsošbuáchema, masque ndegombre endmëna, atše šontsemna jamana ntšamo Bëngbe Bëtsá šomandacá y ntšamo Cristo šomandacá.

22 Chë nÿe batšatema ošbuachiyëngbiamna y Bëngbe Bëtsabe soyëngama nÿe batšatema osertánëngbiamna, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Crístbeñe chamotsošbuáchema. Y lempe

chca, chë atše jamana ntšamo nyetscanga imomncá atše chaitsemnama, endmëna atše jobenayama báseftanga jáyëñjanama Crístbeñe chamotsošbuáchema.

<sup>23</sup> Atše lempe chca sëndama, bëtscá entsanga chë tsabe noticiënguiñe chamotsošbuáchema, y chca, atše atsboaná chaitsemnama y chëngcá atše chayóyëngacñama, chë atsebácanënga Bëngbe Bëtsá yochjatsataye tsabe soyënga.

<sup>24</sup> Tsëngaftanga šmondétatsëmbo, canye luaroye jashjanguama entsanga tmojótjajo orna, banga jotjajuana, pero nye canya chë uacanana soye jóyëngacñana. Chcasna, mo chë uacanana soye jóyëngacñama tmojotjajëngcá, tsëngaftanga cmontsamna jtsiyenana, chë Bëngbe Bëtsábiocana uacanana soye josháchiñama.

<sup>25</sup> Nyetscanga chë tmojótjajënga ínÿënga jáyëñjanama, chënga jopróntana nyetsca soyënguiñe jtsenomándayëse, chca, canye uacanana soye, tsbuanachëngaca uapormana coronésha juayëngacñama; y chësha betesco jtsanctana. Pero bënga ndoñe; bënga mondoyena Cristbiana soyënga jtsamëse, Bëngbe Bëtsábiocana ba tsabe soyënga mo uacanancá jóyëngacñama, y chë soyënga nyetsca tescama bënga mochanjëftsebmna.

<sup>26</sup> Y atšna, atšbe bariëna sëndëntšena Bëngbe Bëtsá jtseservénama, ndoñe mo canya ínÿëngbioye jáyëñjanama tojtjajuacá, chë ndëmoye jashjanguama yomnama ntsetatsëmbcá; y cach ndoñe mo nda tojtsepeliá orcá, chora, cha nye ínÿoye chabe buacuatšënga tojtsëtšana y chë ínÿabe cuerpoye ndoñe.

27 Mo canye tšabe peliayacá, chabe cuerpo játsetšenana y chca chë cuerpo corente jtsemándayana, atše ndoñe quetsatsleséncia chë atše tšabá jtsomñama atšbe ainanentša juabnënga chašotsemándama; y chca, Crístbioye jtseservénëse chamotsiyenama ínÿengbioye stjabuayená chentšana, Bëngbe Bëtsá chašotsaboté chabe uacanana soye josháchiñama, cha ndoñe tšabá tijaservé causa.

## 10

*Cach entsangbe pormana soyënga ndoñe chamondëtsadoránama jábuayenama*

1 Jesucrístbeyeca atšbe catšátanga, atše séntseboše tšëngaftanga chašmotsetátšëmbo bëngbe tempsca bëts taitanga judiënga, chënga nÿetscanga Bëngbe Bëtsá canye jantšetësheca benache yojaninÿanÿná, y chënga nÿetscanga, chë Buángana ca uabaina mar bejayëjana tmojánachnëjna, chiñe mo bojojuiñe cuaftsomñcá.

2 Chë jantšetësheca Moisés imojanëstonama, y chë mar bejayëjana tmojánama, chënga tmojanóbema Moisesbe ústonënga.

3 Chënga nÿetscanga tmojanse cachca saná, chë Bëngbe Bëtsá celocana tojanichmó saná;

4 y nÿetscanga tmojanofsé chë Bëngbe Bëtsá tojanma chë peñësentšana chaóbozna béjaye. Cristo chëngaftaca yojtsemna jtsanÿenama chënga imojtsajnëntscuana, y ntšamo chë peñësentše chëngaftaca tojanopasacá, yojaninÿanÿná Cristo chënga yojtsanÿenama.

<sup>5</sup> Masque chca, banga chënguentsënga ntšamo tmojanmama Bëngbe Bëtsá ndoñe yontsóyejuaye; y chë causa, Bëngbe Bëtsá tojanma chënga chamóbanama chë entsanga ndoyenentše.

<sup>6</sup> Lempe chca tojanopasá bënga jinÿanÿiyama y jábuayenama ntšamo inopása entsanga bacna soyënga jamama tmojtseboše ora, bënga chca jamama ndoñe chamondëtsebošama.

<sup>7</sup> Chíyeca, tšëngaftanga ndoñe šmattsadorana entsangbe pormana soyënga, ndayama ínÿenga jtsejuabnayana diosënga yomna ca, ntšamo báseftanga israeloquënga tmojanmcá. Ntšamo Bëngbe Bëtsabe uabemana palabrënguiñe chëngbiama endayancá, chënga canÿe ternerá castellánoca tmojanpormá ora, mo dios cuaftsemncá jadórama: “Entšanga tmojanotbiama jasama y jatmuama, y chentšana tmojantsbaná joboyeuama ca”.

<sup>8</sup> Boyabása o shembásaftaca bacna soyënga ndoñe šmattsama, ntšamo báseftanga chënguentsënga tmojanmcá, y chë causa, nÿe canÿe te, uta bnëtsana y unga uaranga entsanga tmojanóbana

<sup>9</sup> Bacna soyënga ndoñe šmattsama, jinÿama buetatescama Bëngbe Utabná uantado yochjëftsemnana y ndoñe šochanjacastígayama. Báseftanga chënguentsënga chca tmojanma, y chë causa tmojanóbana mëtšcuayëngaca ftëtšenënga.

<sup>10</sup> Bëngbe Bëtsabe contra ndoñe šmattsóyebuambnaye, ntšamo báseftanga chënguentsënga tmojanmcá, y chë causa, chë ángel obanayá tojanma chënga chamóbanama.

<sup>11</sup> Lempe chca bëngbe tempsca bëts taitángaftaca tojanopasá, bënga jinÿanÿiyama ntšamo jtsiyenana

šojtsamna, y Moisés, Běngbe Bětsabe uabemana palabřėnguiņe chca tojěftsanboshjona bėnga jabuátambama, bėnga, chė Jesucristo yochjėsabo orscama ya batsatema yojtsájamna ora oyenėngbiana.

<sup>12</sup> Chcasna, nda tojtsejuabná Běngbe Utabnabi-ama tšabá yojtsama ca y bacna soyėnga ndocna te yochanjama ca, cuedado chaotsebomna, bacna soyėnga amiņe ndoņe chaondótsatsama.

<sup>13</sup> Ndocna entšá jatócochėnguana bacna soyėnga jamama, ntšamo tempo ínėnga ndoņe tonjanocochėngcá cachca bacna soyėngama, pero tšėngaftanga corente šmondėtatšėmbo Běngbe Bětsá sempre cmochtsėjabuachanama chė padecena soyėnguiņe, y cha ndoņe yochanjalesėnciama bacna soyėnga jamama chacmócochėnguama, tšėngaftanga chca soyėnga jamama jtsóboyayama obenana ntsebomncá; pero chė padecena soyėnguiņe chašmojtsemna ora, cha cmochanjínėnyėye ntšamo chė bacna soyėnga ora tšabá jabocanama, y chca, jtsóboyayama chašmotsobenama.

<sup>14</sup> Chíyeca, atšbe bonshánėnga, ndocna te šmattsadorana cach entšangbe pormana soyėnga, ndayama ínėnga jtsejuabnayana diosėnga yomna ca.

<sup>15</sup> Atše sėntsoyebuambná mo tšėngaftanga corente osertánėnga cuaftsemncá. Cach tšėngaftanga šmochjenójuaboye y šmochjayana, ntšamo cbojtsėtsėsnacá aiņe o ndoņe tšabá bėtsemnana.

<sup>16</sup> Ntšamo Jesús chė coptema vinoyama Běngbe Bětsábioye tbojtanchuacá, bėngnaca cachcá Běngbe Bětsá chama fsėndbėtsatschuanaye.

Bënga chca tmojama ora, ndegombre, jtsinÿanÿnayana bënga Crísoftaca cánÿiñe mo canÿacá imomnama, chabe buiñe juabuáshanëse bëngbiama tojanóbanayeca. Y chë mondbajataye tandëse tmojase ora, jtsinÿanÿnayana bënga Crísoftaca cánÿiñe mo canÿacá imomnama, cha bëngbiama tojanóbanayeca.

<sup>17</sup> Bënga ošbuáchiyënga masque banga mondmëna, chca orna nÿetscanga cach tandësentšana bënga jasana, y chíyeca bënga jtsemnana mo canÿacá, mo Cristbe cuerpcá.

<sup>18</sup> Tšëngaftanga šmochtsejuabnaye ndayá chë Israeloca bachnanga monduamanama: chënga chë altaroca tmojóba y tmojuátšëmbona bayënguentšana jasana, y chca chënga chora jtsinÿanÿnayana chënga cánÿiñe mo canÿacá imojtsemnama Bëngbe Bëtsáftaca, chë chca tmojtsadoranáftaca.

<sup>19</sup> Y chca, atše ndoñe quetsátsboše jayanama chë entšangbe pormana soyënga mo diosënga cuaftsemncá, uámana soyënga yomna ca. Ni chë cach entšangbe pormana soyënga diosënga yomna ca jtsejuabnayëse jadórama uátšëmbona saná inÿe sanama más iuámana ca.

<sup>20</sup> Pero aiñe, entšanga cach entšangbe pormana soyëngama mo diosënga cuaftsemncá, chca tmojuátšëmbona ora, ndegombre chënga Satanás y chabe uajabuachanëngbioye jtsadoránana, y ndoñe Bëngbe Bëtsábioye. Y atše ndoñe quetsátsboše, tšëngaftanga chca uatšëmbonana šmojasama, cánÿiñe mo canÿacá chë bayëjëngaftaca chašmotsemnama.

<sup>21</sup> Tšëngaftanga ndoñe quešmátobena chë

vínoye coptémentšana jofšiyana, ntšamo chë ošbuáchiyënga bétsemnama mondbetsamcá, y chentšana chë cach entšangbe pormana soyënga, mo diosënga cuaftsemncá jadórama vínoye coptementšánënaca. Chca šmojama ora jtsemnana mo chë diablëngaftaca cuaftsesangcá. Y cach ndoñe quešmátobena vínoye jofšiyana y tandëse jasana, ntšamo ošbuáchiyënga bétsemnama mondbetsamcá, y chentšana cach entšangbe pormana soyënga mo diosënga cuaftsemncá jadórama fiestentša sanánaca jasana, y chca chë bayëjëngbioye jtsadoránana.

<sup>22</sup> Bënga chca tmojtsamama, bënga mochanjama Bëngbe Utabná puerte etonaná bëngaftaca chaotsemnama, er chë bayëjëngaftaca bënga chca jt-samana. ¿O imojtsejuabná bënga chabiamama más obenana bomnënga imomna ca?

*Lempe šmochjama Bëngbe Bëtsá puerte bëtsá y uamaná yomnama jinÿanÿiyama*

<sup>23</sup> Mondbétsichamo: “Entselesenciana ndayánaca jamana, ndayama Bëngbe Bëtsá ndocá tonjayana ca”, pero básefta soyënga atše stjama ora ndoñe nÿetscangbe tšabiamama ntsemnana. “Entselesenciana ndayánaca jamama ca”, pero nÿetsca soyënga ntšamo bënga tmojamcá, ošbuachiyëngbioye ndoñe ntjujabuáchana Jesucristbeñe más chamotsošbuáchema, y ainaniñe más añemo chamotsebomnama.

<sup>24</sup> Ndocná chaondétsama lempe ntšamo tojobenacá nÿe cachabe tšabiamama, ndayá más chaot-sama chë ínÿengbe tšabiamama.

25 Lempe mercadoca tmojtseña soyënguentšana šmochjase, ntjatstjanaycá chë mëntšana aíñe o ndoñe tmonjuátšëmbona chë cach entsangbe pormana soyënga, mo diosënga cuaftsemncá jadórama ca. Ndoñe chca šmattsetjanaye, ntšamo tšëngaftangbe ainaniñe juabnënga šmojtsebnoma;

26 er ntšamo Bëngbe Bëtsabe uabemana palabrënguiñe endayancá: “Quem luare Bëngbe Utabnabe soye endmëna, y lempe ntšamo chiñe yomncánaca ca.”

27 Nderado canye ndošbuachiyá tcmojúbuaja chábioca jasama, y tšëngaftanga choye jama tša šmojtsebošëse, lempe ntšamo cha chacmojonanjacá šmochjase, ndayentsana chë saná tojóbcnoma ndocá ntjatstjanaycá, ntšamo tšëngaftangbe ainaniñe juabnënga šmojtsebnoma.

28 Pero nderado nda tcmojáuyana: “Quem mëntšana cach entsangbe pormana soyënga mo diosëngcá jadórama tmonjanátšëmbona ca”, as ndoñe chana šmatjase, er canya chca tcmojáuyana, y ainanentše šmojtsebnoma juabnënga, chë chca jamama ndoñe tšabá bëtsemnama.

29 Atše sëntsoyebuambná ndayá chë chca tcmojauyanabe ainaniñe juabnëngama, chë soye jasana ndoñe tšabá yondmënama, ndoñe chë tšëngaftangbe ainanentša juabnëngama.

Pero tšëngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bëtsemnama, ntšamo chë ínÿabe ainaniñe juabna yobomnama ca?”



30 Y atše chë ndayá stsesama Bëngbe Bëtsá tijëtschuase, ¿ndáyeca inÿa šochjauyana atše ndoñe tšabá tijama ca, chë soye tijasama, chë ndayama Bëngbe Bëtsá tijëtschuá ca?”

31 Masque ntšámnaca, cachcá, chašmojtšesá, o chašmojtsofšěšná, o ndaye inÿe soye chašmojtsama, ndayama Bëngbe Bëtsá ndocá tonjayana, lempe šmochtsama Bëngbe Bëtsá puerte bëtsá y uamaná yomnama jtsinÿanÿnayama.

32 Tondaye šmatjama ndayá chaobená jamana, ínÿenga Cristo chamotsábotema. Ndoñe chca šmatjama, ni judiëngbiama, ni ndoñe judiëngbiama, ni chë Bëngbe Bëtsábeñe ošbuachiyëngcá enefjuanëngbiama.

33 Smochtsama ntšamo atše sëndëntšencá, nÿetscanga nÿetsca soyënguiñe oyejuayënga jtsabamnama, lempe ntšamo stjobenacá jtsaměse, ndoñe nÿe atšbe tšabiama, ndayá masna chë ínÿengbe tšabiama, chënga chamotsobenama chëngbe bacna soyënguentšana atsebácanënga jtsemnama.

## 11

1 Tšëngaftanga šmochtsiyena ntšamo atše sëndamcá jtsaměse, cach ntšamo atše sëndoyencá, ntšamo Cristo inetsamcá jtsaměse.

*Ntšamo yomna shembásenga tšabá jtsemnama, ošbuachiyëngcá tmojénefna ora*

2 Atše sëntseboše tšëngaftanga jáuyanana tšabá šmojama ca, tšëngaftanga nÿetsca soyënguiñe atšbiama šmnétsenojuabnama, y tšëngaftanga šmojtsabuátambama y šmojtsamama ntšamo

tcbonjanabuatambacá, cachcá ntšamo atše sēnjēftsānboshjōncá.

<sup>3</sup> Pero atše sēntseboše tšēngaftanga chacmēsertá: nda n̄jetsca entšanga iuamēnda cha, Cristo endmēna; y nda shēmbioye ibománda cha, boyá endmēna; y nda Crístbioye ibománda chana, Bēngbe Bētsá endmēna.

<sup>4</sup> Nderado can̄ye boyabása chabe bestšaše tojtsenátsbotse, in̄ye ošbuáchiyēngaftaca cán̄yiñe Bēngbe Bētsáftaca tbojtsencuēnta ora o Bēngbe Bētsabe juabna tojtsoyebuambná ora, cha jamana cachá chaotsēuatjama, chabe bestšásēca chca tojama causa.

<sup>5</sup> Pero nderado can̄ye shembása chabe bestšaše ndoñe tontsenátsbotse, in̄ye ošbuáchiyēngaftaca cán̄yiñe Bēngbe Bētsáftaca tbojtsencuēnta ora o Bēngbe Bētsabe juabna tojtsoyebuambná ora, cha jamana chama cachá chaotsēuatjama; jtsēuatjana mo cha lempe jshetētšená cuaftsemncá.

<sup>6</sup> Er, nderado can̄ye shembása ndocna te tontseboše chabe bestšaše jtsenátsbotsana, chabiamama más tšabá nántsemna lempe chaotsenójshetētše. Pero tojtsejuabná utsbotjená o chca lempe jshetētšená jtsemnama cha yochtsēuatja ca, as chabe bestšaše chaotsenátsbotse.

<sup>7</sup> Boyabása ndoñe quebnátsmēna chabe bestšaše jtsenátsbotsana, er Bēngbe Bētsá tojanma ntšamo cachá yomncá cha chaotsemnama, y chē boyabása chca jtsemnēse, jtsin̄yan̄nayana Bēngbe Bētsá chabe mandayá yomnama. Pero ntšamo chē shembása yomncá, jtsin̄yan̄nayana chē boyabása chabe mandayá yomnama;

<sup>8</sup> er Bēngbe Bētsá, boyabása ndoñe

tbonjanma shembásabentšana, ndayá shembása boyabásabentšana.

<sup>9</sup> Y Bëngbe Bëtsá, boyabása ndoñe tbonjanma shembásabeyeca, ndayá shembása boyabásabeyeca.

<sup>10</sup> Chíyeca, y chca jamama angelënga tšabá jtsinÿanánayeca, shembása jtsemnana chabe bestšaše chaotsenátsbotsama, chca, chaotsinÿnama inÿa chábeñe yomándama.

<sup>11</sup> Pero, Bëngbe Utabnábeñe ošbuachiyëngcá jt-siyenamna, boyabásenga y shembásenga cachcá jtseytëtanana.

<sup>12</sup> Er masque Bëngbe Bëtsá, shembása boyabásabentšana tbojanma, mora, shembásabentšana boyabása jóbocnana; y lempe Bëngbe Bëtsábiocana endóbocana.

<sup>13</sup> Cach tšëngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canÿe shembásabiamna Bëngbe Bëtsáftaca jencuëntana, bestšaše ntsenatsbotscá.

<sup>14</sup> Ntšamo entšanga sempre mondbetsejuab-naycá, ndayá tšabá bétsemnana, bëngbioye jtsabuátambayana, boyabása bën stjënësha chabuájuama tojalesenciase, cha jamana cachá chama chaotsëuatjama.

<sup>15</sup> Pero shembásabiamna, chë bën stjënësha jtsinÿanÿnayana chabe botamanana y uámanana, er Bëngbe Bëtsá tojanma shembása bën stjënësha chaotsábomnana, chca, cha chaotsebomna ndáyeca chabe bestšaše jtсенátsbotsama.

<sup>16</sup> Masque ntšámnaca, ndánaca tojtseboše quem soyama más jatóyebuambayama, cha bontsemna jtsetatsëmbuana, ni bënga, ni Bëngbe Bëtsábeñe

ošbuachiyëngcá enefjuanënga queftsatsleséncia chca ndoñe chaondétsemnama.

*Bëngbe Utabnabiamá jtenójuaboyama jasama ora, chënga ndoñe tšabá imonjánama*

17 Mora cbochanjamënda soyënguiñe atše ndoñe quetsátobena tšëngaftanga jáuyanana tšabá šmojama ca, er tšëngaftanga Crístbeñe ošbuachiyëngcá šmojénefjna ora, Bëngbe Bëtsá jadórama, atše šontsinýana chë soye yojtsoserverna tšëngaftanga más bacá chašmotsemnama, y ndoñe tšëngaftangbe tšabiamá.

18 Natsana cbochjáuyana, atše sënjouena tšëngaftanga ošbuachiyëngcá šmojénefjna ora, báseftanga canýe soye innétsejuabnaye y ínýengna inýetšá ca, y atše sëntsejuabná batšana ndegombre chca yojtsemna ca.

19 Ndegombre jtseytana tšëngaftangbeñe chamotsemna báseftanga canýe soye juabnayënga y ínýengna inýetšá, chca, nýetscanga chamotsetatsëmbuama ndëmuanýenga imojtsemna chë Bëngbe Bëtsá tojayana chënga tšabá tmojama ca.

20 Tšëngaftanga tandëše jasama y vínoye jofšiyama šmojénefjna ora, ntšamo bënga fsënduamancá, Bëngbe Utabná bëngbiamá tojanóbanama jtenójuaboyama, ndayá chora tšëngaftanga šmnetsamcá, ndoñe quenátsmëna ntšamo ndegombre cmojtsamncá, chë Bëngbe Utabnabiamá jtenójuaboyama jasama ora;

21 er chë jasama tojobuache ora, cada ona inóntša jasama ndayá tojiyëbcá, y ndoñe ntjatobátmanana nýetscanga ndayánaca jasama chamotsebomnëntscuana; báseftanga shëntseca

joquédana, y ínÿengna tša jéftsesana y jofšiyana jéftsótmenantscuana.

<sup>22</sup> ¿Tšèngaftanga ndoñe yebna šmondobomna ndayentše jasama y jofšiyama? ¿Ndáyeca tšèngaftanga šmojtsejuabná chë imménéfjna ošbuáchiyënga nduámanënga imomna ca, y šmojama chë chentše tmojtsemnënga, tondaye ndbomnënga, chamotsëuatjama? ¿Tšèngaftanga šmojtsejuabná atše cbochjáuyana tšabá šmojama ca, chë Bëngbe Utabnabiama jasama ora chca šmojamama? ¡Ndegombre ndoñe!

*Bëngbe Utabnabiama jtenójuaboyama saná  
(Mt 26.26-29; Mc 14.22-25; Lc 22.14-20)*

<sup>23</sup> Er atše cach Bëngbe Utabnábentsana ntšamo cbontsabuatëmbacá sënjanóyëngacñe: Bëngbe Utabná cach uayayëngbe cucuatšinë tmojánboshjona ibeta, tandëse tojanca,

<sup>24</sup> Bëngbe Bëtsábioye tbojtanchuá chentsana, tojanjatá y tojánayana: “Quem tandëse atšbe cuerpo entsemna; tšèngaftangbe tšabiama chanjóbana. Ntšamo mora montsamcá šmochtsama, atšbiama jtenójuaboyama ca.”

<sup>25</sup> Cachcá, chë saná tmojansentsana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tšèngaftanga chašmotsetatšëmbuama, ntšamo Bëngbe Bëtsá entsanga tojanašebuachenacá pronto yochtsemnama. Cada vínoye chašmojtsofšëšná ora, chca šmochjama atšbiama jtenójuaboyama ca.”

26 Er tšëngaftanga cada quemëntša tandëse chašmojtšesá ora y quem coptementšaycá chašmojtsofšëšná ora, Bëngbe Utabná chaojésabëntscuana tšëngaftanga šmochántsinŷanŷnaye cha entšangbiana tojanóbanama.

*Ntšamo yomna jamana, Bëngbe Utabnabiana jtenójuaboyama jasama ora*

27 Chcasna, Bëngbe Utabnabiana jtenójuaboyama jasama ora, ndánaca tandëšentsana tojase y coptémentšana tojofšé, ndoñe chë ntšamo chaotsemnama Bëngbe Utabná yojanjuabnacá, chabiana Bëngbe Bëtsá jayanana cha puerta bacna soye tojama ca. Chë entšá chca tojama ora, cha jtsinŷanŷnayana, Bëngbe Utabnabe cuerpo y buiñe chabiana tondaye yonduámanama.

28 Chíyeca, entsemna cada ona corente chauenojuabó jtsetatšëmbuama aíñe o ndoñe yontseprontana chca jasama y jofšiyama, cabá ndëse y ndofšé ora.

29 Er nderado nda tojase y tojofšé, chë Bëngbe Utabnabiana jtenójuaboyama jasama ora, cach Bëngbe Utabnabe cuerpo yomnama ntjajuaboycá, cha chë sóyeca jamana Bëngbe Bëtsá chabotsecastigama.

30 Chíyeca, banga tšëngaftanguentšënga šoquënga šmojtsemna, ínŷenga añemo ndbomnënga, y ínŷengna ndoñe nŷe báseftanga tmojóbana.

31 Pero bënga corente tmojajuabó jtsetatšëmbuama aíñe o ndoñe montseprontana ntšamo šuamncá jasama y jofšiyama, cabá ndëse y ndofšé ora; chca, Bëngbe Bëtsá ndoñe buántsemna

bënga játaçastigana, ntšamo tšabá yomncá ndoñe tmonjase causa.

<sup>32</sup> Pero, Bëngbe Utabná castígoca chca sojabuayená ora, jtsemnana bënga más tšabá jtsamama chamuatsjínÿama, y chca, bayté chentšana, Bëngbe Bëtsá ndoñe chabondëtsemna játayanana bënga šojtsamna nÿetsca tescama castigánënga jtsemnama ca, cánÿiñe chë nÿe quem luarama enójuabnaye entšángaftaca.

<sup>33</sup> Chca, Jesucrístbeyeca atšbe catšátanga, tšëngaftanga chë Bëngbe Utabnabiana saná jasama chašmojénefjna ora, cánÿiñe nÿetscanga šmochjabojátša.

<sup>34</sup> Y nderado nda tbojtseshëntsana, cachabe yebnocá chauétsese, chca, Bëngbe Bëtsá ndoñe chabondëtsemna tšëngaftanga jácaçastigana chora ndoñe tšabá šmonjama causa. Chë inÿe soyëngama ndayama tšëngaftanga šmonjatjá, chamna chanjamánda tšëngaftanga jányama chaijá ora.

## 12

### *Bëngbe Bëtsabe tšetana obenana, tšabe soyënga jamama*

<sup>1</sup> Jesucrístbeyeca atšbe catšátanga, atše sëntseboše tšëngaftanga chašmotsetátšëmbo Bëngbe Bëtsabe tšetana obenanama tšabe soyënga jamama, Crístbeñe ošbuáchiyënga jujabuáchama.

<sup>2</sup> Tšëngaftanga šmondëtatšëmbo, tšëngaftanga Crístbeñe ndošbuáchiyënga šmonjamna ora, ínÿenga cmonjanabuatambá soyënga, y chora tšëngaftanga šmonjamna ínÿabeyeca uasjanëngcá, cach entšangbe pormana soyënga mo diosënga

cuaftsemncá jadórama; y chë soyëngna ni mo jóyebuambayama ntsobenana.

<sup>3</sup> Chíyeca, atše mora sëntseboše tšëngaftanga chašmotsetátšëmbo, ndocná ntsobenana jayanana: “Jesús ndoñe chë Cristo quenátsmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsóyebuambnase. Y cach ndocná ntsobenana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñe tontsóyebuambnase.

<sup>4</sup> Espiritu jamana bënga ndoñe chamondëtsebonnama cachca tšetana obenana tšabe soyënga jamama, pero lempe jobayana cach canye Espiritbeyeca.

<sup>5</sup> Bënga, Bëngbe Bëtsá mondëserveda, nyetsca soyënguiñe jtsetrabájayëse, pero cach Utabná nyets chë trabajënga šojabanýé.

<sup>6</sup> Nyetsca soyënga Bëngbe Bëtsabe obenánaca fsëndbëtsama, pero cach Bëngbe Bëtsá endmëna nda inétsama bënga chë soyënga jamama obenana chamotsebonnama.

<sup>7</sup> Bëngbe Bëtsá inétsama cada ošbuachiyá chaotsebonnama canye tšetana obenana tšabe soyënga jamama, y chë soye jtsinýanýnayana Bëngbe Bëtsabe Espiritu chabe ainaniñe yomnama; y chë tšetana obenana jtsemnana nyetscangbe tšabiamama.

<sup>8</sup> Bëngbe Bëtsá, Espiritbeyeca, canya obenana jatštayana puerte osertanánaca chaóyebuambama, y ínýana obenana cach Espiritbeyeca ndayámnaca corente jtsetatšëmbëse chaóyebuambama;

<sup>9</sup> ínýana cach Espiritbeyeca, obenana Crístbeñe puerte chaotsošbuáchema, y ínýabiamna, cach nye canye Espiritbeyeca, obenana jatštayana šoquënga



jáshnama;

<sup>10</sup> ínÿana, obenana tšabe soyënga Bëngbe Bëtsabe obenánaca jamama, y ínÿana, obenana Bëngbe Bëtsabe juabna jóyebuambayama. Inÿana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espíritbeyeca o bacna espiritëngbeyeca tojtsemnana, y ínÿana, obenana chë tempo ndmabiyáñnaca chaóyebuambama, y ínÿana, obenana josértama ntšamo chë ndaye biyáñnaca jóyebuambayama obenana bomná tojt-sichamcá, y ínÿengna chama jábuayenama.

<sup>11</sup> Pero cach Espíritu, chë nÿe canÿe Espíritu lempe chca jamana, ntšamo tšabá bétsemnana cha tojtsejuabnacá cada entšábioye jatštayëse.

*Nÿetsca ošbuáchiyënga cánÿiñe, mo Cristbe cuerpcá jtsemnana*

<sup>12</sup> Cuerpo nÿe canÿe soye endmëna y chë cuerpnna ba soyënga jtsebomnana; masque chë cuerpo ba soyënga jtsebomnana, nÿe canÿe cuerpo jtsemnana. Bëngaftácnaca cachcá. Bënga banga mondmëna nÿetscanga Crístbeñe ošbuáchiyënga, pero Crístbeyeca, bënga cánÿiñe mo canÿacá jtsemnana.

<sup>13</sup> Er bënga nÿetscanga, judiënga o ndoñe judiënga, nÿe ínÿabiama nÿets tempo oservénënga o cachëngbiamna trabájayënga šojanëbaye, Crísoftaca cánÿiñe mo canÿacá, jtsemnana mo chabe cuerpcá, y chca yomna cach Espíritbeyeca; y Bëngbe Bëtsá tojama cach Espíritu nÿetscangbe ainanoye cháuamashënguama, bënga jtsamëndayama.

<sup>14</sup> Cachcá, canÿe cuerpo ndoñe nÿe canÿe soye ntsebomnana, ndayá ba soyënga.

15 Nderado shecuatše tojayana: “Cucuatše ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, shecuatše mo chë cuerpentša soye ndoñe cuaftsemncá ndoñe ntjátsmënana.

16 Nderado matscuaše tojayana: “Bominýe ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, matscuaše chë cuerpentša soye ndoñe cuaftsemncá ndoñe ntjátsmënana.

17 Nyets cuerpo bominýe tojtsemnëse, bënga ndoñe muantsobena jouenama. Y nyets cuerpo matscuaše tojtsemnëse, bënga ndoñe muanjobenaye jonguëtsetsiyana.

18 Pero ndegombre endmëna, Bëngbe Bëtsá nyetsca soye cuerpentše tojancjá ndayentše cha tojánbošenentše.

19 Nyetsca cuerpentša soyënga nýe canýe soye tojtsemnëse, ndoñe canýe cuerpo nántsemna.

20 Pero ndegombre endmëna, masque ba soyënga cuerpentše yomna, nýe canýe cuerpo jtsemnana.

21 Bominýe quenátobena cucuatše jauyanana: “Ndoñe quecátsiyta ca”; y cachcá, bestšaše quenátobena shecuatše jáuyanana: “Ndoñe quecátsiyta ca”.

22 Inýetsá, chë cuerpentša soyënga, chë tojtsinýana mo obenana ndbomna y nduámana soyëngcá, jtsemnana chë cuerpama más iyta soyënga.

23 Chë cuerpentša soyëngama, ndayama bënga tmojtsejuabná más nduámana soyënga

yomna ca, bēnga jamana más chaotsámanama, chiñe entšayaca jtichětjēse. Y chē cuerpentša soyēnga, ndayama bēnga jtsēuatjana ínŷenga chamotsonŷama, bēnga jamana ínŷenga ndoñe chamondětsonŷama, chiñe entšayaca jtichětjēse.

<sup>24</sup> Pero chē cuerpentša soyēngaca, chē nŷetscanga jtsonŷayana y botamana jinŷama jtsemnana soyēngacna, ndoñe ntseytana chca játamana. Bēngbe Bětsá cuerpo tojama, ntšamo bēnga chamotsamama chentša más nduámana soyēnga, más chaotsámanama, ntšamo chē soyēnga bēnga tmojtsinŷenama.

<sup>25</sup> Cha chca tojanma, cuerpentša nŷetsca soyēnga chē cuerpama trabajo cánŷiñe chamotsamama, y chca, cada soye chaotsama trabajo chē cuerpentša nŷetsca soyēngbe tšabiama.

<sup>26</sup> Nderado canŷe cuerpentša soyama bacna soye tojopasá, chora nŷetsca chē cuerpentša soyēngámnaca chca ndoñe tšabe soye jtsebínŷnana; pero canŷe cuerpentša soyama tcojama más uámana soye chaotsemnana o ndaye tšabe soye tojopasase, chora nŷetsca chē cuerpentša soyēngámnaca chca tšabe soye jtsebínŷnana.

<sup>27</sup> Cachcá, tšēngaftanga Crístbeñe ošbuáchiyēnga, cháftaca cánŷiñe mo canŷacá jtsemnēse, mo chabe cuerpca jtsemnana, y cada ona tšēngaftanguentšá mo chē cuerpentša soyēngcá, jtsemnana mo chabe cuerpentša soyēngcá.

<sup>28</sup> Ntšamo Bēngbe Bětsá cuerpentše soyēnga tojancjá ndayentše inabošcá, cachcá, ošbuachiyēngcá enefjuanēngbeñe Bēngbe Bětsá tojubuáyana, natsana báseftanga mo Jesucristbe

ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiana abuátambayënga, chorna chë bëts soyënga Bëngbe Bëtsabe obenánaca jamama obenana bomnënga, chë shoquënga jáshnama obenana bomnënga, chë ínÿengbioye puerte ujabuáchanënga, chë inÿe ošbuachiyëngbioye amëndayënga, y chë nÿetsca biyañe jtsóyebuambnayama obenana bomnënga, tempo ndmabiyañe.

<sup>29</sup> Ndegombre, ošbuachiyëngcá ene-fjuanëngbeñe nÿetscanga ndoñe Jesucristbe ichmónënga ntsemnana, nÿetscanga ndoñe Bëngbe Bëtsabe juabna oyebuambnayënga, nÿetscanga ndoñe abuátambayënga, nÿetscanga ndoñe Bëngbe Bëtsabe obenana bomnënga, bëts soyënga jamama.

<sup>30</sup> Nÿetscanga ndoñe shoquënga jáshnama obenana bomnënga; nÿetscanga ndoñe nÿetsca biyañe jtsóyebuambnayama obenana bomnënga, tempo ndmabiyañe; ni nÿetscanga ndoñe obenana bomnënga quemátsmëna, chë tempo ndmabiyañe nÿetsca biyañe jtsóyebuambnayama obenana bomnënga ntšamo tmojtsichamcá josértama y ínÿengbioye chama jtsabuayiynayama.

<sup>31</sup> Pero tšëngaftangna puerte šmochtseboše, lempe ntšamo chašmojobenacá šmochjama, chë Bëngbe Bëtsabe más uámana tšetana obenana jëftsashjáchama.

### *Bonshánana jtsebomnana*

Y inÿe soye más, atše cbochanjínÿanÿiye ntšamo šmojtsobena cabá más tšabá jtsiyenana, Bëngbe Bëtsá jtseservënese.

## 13

<sup>1</sup> Nderado atše stjóyebuambaye entšangbe biyañe y angelëngbe biyañe, pero ínÿengbioye ndoñe sentsababuánÿeshanëse, atše stsemna canÿa tondayama uamaná, mo nÿe canÿe metalëshe tojtsenancá, o mo nÿe canÿe platillëshcá ndoñe tšabá tontsenanëshe.

<sup>2</sup> Y atše obenana stsebmna Bëngbe Bëtsabe juabna jóyebuambayama y nÿetsca soyëngama, y chë Bëngbe Bëtsá tempo entšanga ndoñe tonjaninÿanÿé soyënga šojtsësertana, y Bëngbe Bëtsabe nÿetsca soyëngama stsetátšëmbo, y Crístbeñe puerte stjesošbuáchiye, chca betsošbuáchema nÿa mo chë tjashënga chamobonjoma jamama, pero ínÿenga ndoñe sentsababuánÿeshanësna, atše tondaye séntsemna.

<sup>3</sup> Y atše lempe ntšamo stsebmncá ndbmnejëmënga stšëjátaye, y ínÿengbioye stjenontréga atšbe cuerpo chamojuinÿema, pero ínÿengbioye ndoñe sentsababuánÿeshanëse, atše ndocna uámana soye ntjashjáchana.

<sup>4</sup> Canÿe entšá ínÿenga ababuanÿeshaná, uantado jtsemnana masque padecena soyënguiñe tmojtsemna órnaca, y ínÿengaftaca tšabe ainánaca mando jtsebmnanana. Inÿenga ababuanÿeshaná ndoñe ntsántšabošana ntšamo inÿa tojatsbmncá, ni ntsenábotamnayana, ni cachá chë ínÿengbiana más uamaná ntjáténobiamnayana;

<sup>5</sup> ndoñe bacá mandbmncá ínÿengaftaca ntsemnana, ni nÿets tempo ntsebošana y lempe jt-samana nÿe chabiana tšabe soye jónÿenama; cha nÿe ndayámnaca ndoñe ntjetnana, ntšamo ínÿenga tmojaborlá ora jtsaperdónayana.

<sup>6</sup> Inyenga ababuanjeshaná ndoñe ntjóyejuayana chë ndoñe tšabá yondmëna soyëngama; chë ndegombre yomna soyëngamna aíñe.

<sup>7</sup> Inyenga ababuanjeshaná, ainaniñe añemo jtsebomnana nyetsca padecena soyënguiñe, lempe ntšamo más tšabá yomna soyënguiñe jtsošbuáchiyana, nyetsca más tšabá yomna soyëngama jtsobátmanana, y jtsóboyayana nyetsca toto soyënga.

<sup>8</sup> Bonshánana nyetsca tescama jëftsemnana. Canye te echántsemna, chora chë Uámana Espíritu ndoñe más queochátama entšanga Bëngbe Bëtsabe juabna chamotsóyebuambnama, ni chë ndocna te ndmabiyañe chamotsóyebuambnama, ni chë puerte jtsetatšëmbëse jóyebuambayama obenama chamotsebomnama;

<sup>9</sup> er ntšamo mora bënga imotatšëmbcá y Bëngbe Bëtsabe juábnaca jóyebuambayëse tmojayana soyënga, nye batšatema bëngbioye jtsinñanñayana Bëngbe Bëtsabe soyëngama, ndoñe lempe;

<sup>10</sup> pero Jesucristo chaojésabo ora, y chaojama bënga chamotsemna lempe ntšamo Bëngbe Bëtsá bëngbiama yojanjuabnacá, quem soyënga, chë nye batšatema bëngbioye jtsinñanñayana Bëngbe Bëtsabe soyëngama, ya ndoñe más queochátšbinña.

<sup>11</sup> Atše básatema ora, sënjanoyebuambná, sënjanjuabná, y soyëngama tšabá jtsetatšëmbuamna sënjanjuabná mo canye basatemcá; pero bëtsá sënjanóbema orna, sëntsanajbaná lempe amana mo canye basatemcá.

<sup>12</sup> Cachcá, mora bënga quem luarentše nye batšatema Bëngbe Bëtsabe soyëngama

jtsetatsëmbuana, mo canÿe espejuñe tmojtsonÿacá, pero ndoñe nÿa corente tšabá. Pero canÿe te bēnga mochántsetatsēmbó lempe nÿetsca soyēngama, bēnga Bēngbe Bētsabe delante chamojtsemna ora. Mora atše sēntsetatsēmbó nÿe batšatema Bēngbe Bētsabe soyēngama, pero chora lempe chanjuábuatmana, ntšamo Bēngbe Bētsá corente šuabuatmcá.

<sup>13</sup> Pero morna, Bēngbe Bētsábeñe jtsošbuáchiyana, chábeñe jtsobátmanana, y chábioye y ínÿengbioye jtsababuánÿeshanana, chē soyēngna nÿetsca tescama jēftsemnana; pero chentšana chē más uámana soye endmēna ínÿenga jtsababuánÿeshanana.

## 14

### *Ndmabiyañe obenana Bēngbe Bētsabe tšetánana*

<sup>1</sup> Bētsá śmochtsama nÿetscanga jtsababuánÿeshanēse chašmotsiyenama, y puerte śmochtseboše jtsebonnama chē Bēngbe Bētsabe tšetana obenana tšabe soyēnga jamama; pero chentšana masna, chē Bēngbe Bētsabe juabna jóyebuambayama obenana.

<sup>2</sup> Er chē tempo ndmabiyañe mora jóyebuambayama obenana bomná, Bēngbe Bētsábioye jtsatsētsnayana y ndoñe entšángbioye, er ndegombre entšanguentše ntšamo cha tojtsoyebuambnacá ndocná ntjosértana; chana chabe espíritoftaca jtsóyebuambnayana y ndoñe nÿe chabe juábnaca, chē tempo Bēngbe Bētsá ndocna entšábioye tbonjaninÿinÿé soyēngama.

3 Pero chë Bëngbe Bëtsabe juabna oye-  
buambnayana entsanga jtsëtsëtsnayana, chënga  
más chamotsošbuáchema y ainaniñe añemo  
chamotsebomnama, Bëngbe Bëtsabe soyëngama  
jábuayenama, y jamama padecena soyënguiñe  
tmojtsemna órnaca añemo chamotsebomnama.

4 Chë tempo ndmabiyañe mora jóyebuambayama  
obenana bomná, jtsamana nÿe cha más  
jtsošbuáchiyama y ainaniñe añemo jtsebomnama;  
pero chë Bëngbe Bëtsabe juabna oye-  
buambnayana jtsamana chë ošbuachiyëngcá enefjuanënga chca  
soyënga chamotsebomnama.

5 Atše sëntseboše nÿetsca tsëngaftanga chë tempo  
ndoñe šmonjanbiyañe mora jóyebuambayama  
obenana chašmotsebomnama, pero chama atše  
más sëntseboše tsëngaftanga chë Bëngbe Bëtsabe  
juábnaca soyënga chašmotsóyebuambnama. Chë  
Bëngbe Bëtsabe juábnaca soyënga oye-  
buambnayá más uamaná jtsemnana chë inÿe biyañe  
oyebuambnayabiama; chca ndoñe nántsemna,  
ntšamo canÿe biyañe tojayancá chë biyañe  
oyebuambnayá tbojtsësertánëse y chë  
ošbuachiyëngcá enefjuanënga tojábuayenase,  
y chca, chë soyënga tmojouenama, chënga  
chamotsobena más jtsošbuáchiyama y añemo  
jtsebomnama.

6 Y mora, Jesucristbeyeca atšbe catšátanga,  
atše nderado tchojábuache y nÿe inÿe biyañe  
tchojáuyanëse, ¿chca ntšamo cbatjúabuache?  
Atše jtsoobenana jujabuáchana, nÿe ntšamo  
chë biyañe tijayancá átšnaca šojtsësertánëse,  
y ndayá Bëngbe Bëtsá šojinÿinÿecá entsanga



jábuayenama stjobenase, chë Bëngbe Bëtsá tojama atše jtsetatšëmbuama soye, chë Bëngbe Bëtsabe juábnaca stsoyebuambná soye o chë tšëngaftanga jabuátambama cha yoboše soye.

<sup>7</sup> Entšanga monduamana ndayánaca juénanana, mo flautëfja o arpa, vida ndbomna soyënga; cada sóyeca inyëtšá juénanama ndoñe tontsopodénëse, ndocná nantsobena jtsetatšëmbuama ndayá canya chë soyëngaca yojtsénanama.

<sup>8</sup> Y nderado nda trompetëfjua tojuájatëta ora, soldadënga japéliama chamoprontama, chë uajatëtaná inyëtšá, nya chama ndoñe tonjuájatëtëse, ndocná buanjósërta y jempéliama ndoñe nanjoprónta.

<sup>9</sup> Tšëngaftangaftácnaca cachcá jtsopasánana. Inyënga paselo josértama jobenaycnana tšëngaftanga ndoñe šmonjóyebuambase, ndocná queochátstatšëmbo ntšamo šmojtsichamcá. Nántsemna mo nýe cányënga cuaftsoyebuambnacá.

<sup>10</sup> Atše sëntsejuabná, ndegombre quem luarentše ba inye biyañe entšanga innëtsoyebuambnayana, y ndaye biyáñnaca tmojoyebuambá ora, sempre jtsemnana inyënga ntšamo chënga tmojtsichamcá osertánënga.

<sup>11</sup> Pero ntšamo inya chabe biyañe šojauyancá atše ndoñe šontsësertánëse, atše stsemna canye chabiamana ndosertana biyañe oyebuambnayá, y chánaca cachcá atšbiamana.

<sup>12</sup> Chcasna, chë Uámana Espíritu šondinyänyná obenana jtsebomnama tšëngaftanga puerte šmobóseyeca, lempe ntšamo šmojobenacá šmochtsama chca tšetana obenana jóyëngacñama, chë ošbuáchiyënga más jtsošbuáchiyama y añemo

jtsebomnama inétsama obenana.

13 Chíyeca, chë tempo ndmabiyañe mora jóyebuambayama obenana tojtsebomná, Bëngbe Bëtsá chabotseimpadana, cha chaoma ntšamo chë inye biyañe tojayancá chabosertama y ošbuáchiyënga jábuayenama obenana chaotsebomnama.

14 Pero atše Bëngbe Bëtsáftaca stjencuénta, chë ndmabiyañe jóyebuambayama cha obenana šojanatšetacá jtsóyebuambnayëse, atšbe espíritu cháftaca nantsóyebuambnaye, pero atšbe juabna ndoñe ntsetatsëmbuana ntšamo chë espíritu tojtsoyebuambnacá.

15 Y asna, ¿ntšamo atše chtsemana? Bëngbe Bëtsáftaca chanjencuénta atšbe espíritoca, pero ntšamo stsichámuama jtsejuabnayësnaca. Bëngbe Bëtsá jëtschuayama chanjavérsia atšbe espíritoca, pero chca chanjama chíñnaca jtsejuabnayëse.

16 Nderado aca Bëngbe Bëtsá cojtsatschuaná nye espíritoca, y canya quem Bëngbe Bëtsabe tšetana obenanama ndosertaná tcmojóyeunase, cha ndoñe ntsobenana jayanana “chca chaotsemna ca”, cach aquëcá cha yojtsejuabnama jinjinyiyama, er ntšamo cojtsichamcá cha ndoñe ntsësertánana.

17 Aca jtsobenana chca puerte tšabá Bëngbe Bëtsá jëtschuayana, pero ntšamo tcojtsamcá ndoñe ntjamana inya ndaye tšabe soye chaotsebomnama.

18 Atše, Bëngbe Bëtsá sëntsatschuaná inye biyañe jóyebuambayama tšëngaftangbiana más tsobenama;

19 pero Crístbeñe ošbuachiyëngcá tmojénefna ora, atše más sëndbétseboše nye mo shachna palabratémnaca jóyebuambayana, chënga aíñe

catafjosertacá, chca, ínÿenga jabuátambama, y ndoñe bnétsana uaranga palabrënga jatóyebuambnayana inÿe biyañe, chënga chaósertama ndoñe tontsopodénëse.

<sup>20</sup> Jesucrístbeyeca atšbe catšátanga, šmochtsajbaná basetemëngcá juabnayana. Mo šešonatemëngcá šmochtsemna, bacna soyënga jamama ntsetatšëmbcá; pero mo bëtsëtsangcá tšabá šmochtsejuabnaye.

<sup>21</sup> Bëngbe Bëtsabe uabemana palabrënguiñe, Bëngbe Utabná mëntšá tojánayana:

Atše quem entsángbioye chanjáuyana,

ínÿenga inÿe luarëngocana ashjajnëngaftaca, chëngbiama canÿe ndosertana biyañe oyebuambnayënga;

y chanjáuyana ndayá chëngbe biyañe chamojt-sichamo soyëngaca;

pero ni chca, chënga ndoñe quešmochatóyeunaye ca.

<sup>22</sup> Chcasna, inÿe biyañe jóyebuambayama obenana jtsebomnana endmëna, Bëngbe Bëtsá ndayánaca chë chábeñe ndošbuachiyëngbioye jinÿanÿiyama, y chábeñe ošbuachiyëngbioyna ndoñe. Pero, Bëngbe Bëtsabe juabna jóyebuambayama obenana jtsebomnana endmëna, Bëngbe Bëtsá ndayánaca chábeñe ošbuachiyëngbioye jinÿanÿiyama, y chábeñe ndošbuachiyëngbioyna ndoñe.

<sup>23</sup> Er tšëngaftanga nÿetscanga ošbuachiyëngcá šmojënefna ora, nÿetscanga ba biyañe šmojtsoyebuambná, y choye tojámashëngo canÿa chca Bëngbe Bëtsabe tšetana obenanama ndosertaná o chábeñe ndošbuachiyá, cha

nanjájuaboye tšëngaftanga opënga šmojtsóbema ca.

<sup>24</sup> Pero nyetscanga tmojtsichamo, Bëngbe Bëtsabe juábnaca jtsóyebuambnayëse, y choye tojámashëngo canya Bëngbe Bëtsábeñe ndošbuachiyá o canya chca Bëngbe Bëtsabe tšetana obenanama ndosertaná, ntšamo chašmojtsichamcá cha bochanjosérta; y chë soye cha bochanjayënjaná cha bacna soyënga tojamama, y ndayá cha tojamiñe corente echántsejuabnaye, ntšamo nyetscanga tmojtsichámuama.

<sup>25</sup> Y Bëngbe Bëtsá chábioye bochanjinýinýiye ntšamo cha ainaniñe tojajuabó y tojabošencá, ndayá ndocnábioye tbonjinýinýecá, y cha echanjoshëntsamentšiyë Bëngbe Bëtsá jadórama, y tšëngaftangbe delante echanjayana Bëngbe Bëtsá ndegombre tšëngaftangbeñe yojtsemna ca.

*Ošbuachiyëngcá šmojénefjna ora, ntšamo tšabá yomncá lempe šmochtsama*

<sup>26</sup> Chcasna, Jesucrístbeyeca atšbe catsátanga, šmojénefjna ora, cada ona ndayánaca jtsebomnana nyetscangbiamá: ínýengna jtsobenana javérsiama, Bëngbe Bëtsá jëtschuayama, ínýengna jtsobenana jabuátambana o jábuayenama ndayá Bëngbe Bëtsá tojinýanýecá, o tempo ndmabiyañe chora jtsóyebuambnayana, o entšanga jábuayenana ntšamo inya inye biyañe tojayancá. Pero lempe šmochjama, ošbuáchiyënga más chamot-sošbuáchema y más añemo chamotsebomnama Cristo jasérviamá.

<sup>27</sup> Nderado inye biyañe jóyebuambayama tojtsemnëse, útata o nya másese únganga chca

chamoyebuambá, y canyánÿa; y jtseytana ndánaca ntšamo tmojtsichamcá chabosertá y nÿetscanga chama chauabuayená.

<sup>28</sup> Y chca chabosertama y nÿetscanga jábuayenama ošbuachiyëngbeñe ndocná tontsemnëse, as ošbuachiyëngcá chamojénefjna ora chë chca oyebuambnayá bontsemna ndoñe chca biyañe ntsóyebuambnayana, sinó nÿe canÿa tojtsemna ora cha jtsobenana chca Bëngbe Bëtsáftaca jencuéntana.

<sup>29</sup> Utata o únganga entsamna jayanana soyënga, Bëngbe Bëtsabe juábnaca jtsóyebuambnayëse; y chë ínÿenga jtsamnana botamana jajuaboyana y jayanana ntšamo chënga tmojayancá aíñe o ndoñe Bëngbe Bëtsábiocana tayojsóboconama.

<sup>30</sup> Pero canÿa Bëngbe Bëtsabe juabna tojtsóyebuambnantscuana, ínÿa chentše ouenana tbemanábioye Bëngbe Bëtsá tbojinÿinÿé ndayánaca yojtsebomna jayanama, as chë natsana oyebuambnayá iytëca chaóbema, y chabolesenciá chë ínÿa chaóyebuambama.

<sup>31</sup> Chca, nÿetscanga, canyánÿa jtsobenana jayanana soyënga, Bëngbe Bëtsabe juábnaca jtsóyebuambnayëse, nÿetscanga chamuatsjínÿama y nÿetscanga añemo jatšatayama.

<sup>32</sup> Chë Bëngbe Bëtsabe juabna oyebuambnayá endobena jtsemándayana ntšamo tojtsichamcá, cha cachabe espírituca tojtsoyebuambná ora;

<sup>33</sup> er Bëngbe Bëtsá endmëna nda inétsama bënga natjëmbana chamotsiyenama, y ndoñe chë bënga nÿetscanga cachcá ndoñe chamondëtsejuabnama, y nÿe ntšamo cada ona tojtsebošcá chaotsamama.

Ntšamo nyets luarënguenache, chë ošbuáchiyënga, chë Bëngbe Bëtsabe entsanga mondbénefjna luarënguenache endbetsemncá,

<sup>34</sup> tšëngaftangbéntšnaca, shembásenga entsamna iytëca jobiamëngana, ošbuachiyëngcá šmojénefjna ora, er ndoñe quenátslesenciana chënga chora chamuátoyebuambnama, y aíñe chënga entsamna chëngbe boyanga jtsayaunanana, ntšamo Moisesbe leyiñe endayancá.

<sup>35</sup> Chënga ndayánaca jtsetatšëmbuama tmojtsebošëse, cachëngbe boyángbioye yebnoca chamotjanga; er ndoñe corente tšabá ntsemnana canye shembása jtsóyebuambnayana tšëngaftanga ošbuachiyëngcá šmojénefjna ora.

<sup>36</sup> ¿Tšëngaftanga šmojatsjuabná, Bëngbe Bëtsabe tšabe noticiënga tšëngaftangbeñe tojanobojatšé ca, o nye tšëngaftanga chë soyënga šmojanóyëngacñe ca? Ndegombre ndoñe chca; chíyeca tšëngaftanga nye cányënga ndoñe ntso benana jayanama ndayá jamama cmojtsamnama.

<sup>37</sup> Nda tojtsejuabná cha Bëngbe Bëtsabe juabna oyebuambnayá yomna ca, o chabe ainaniñe chë Espíritu jtsemándayama yojtsebomna ca, cha bontsemna tšabá jtsetatšëmbuana, ntšamo Bëngbe Utabná šojamandacá atše stsabiamnama.

<sup>38</sup> Pero cha ndoñe chca tontsetátšëmbo y chca ndoñe yondmëna ca tojayanëse, ndayá cha tojayanacá ndoñe šmatjóyëngacñe.

<sup>39</sup> Chcasna, Jesucrístbeyeca atšbe catšátanga, puerte šmochtseboše Bëngbe Bëtsabe juábnaca soyënga jtsóyebuambnayama obenana jtsebomnama, y ndoñe šmattsama chë tempo ndmabiyañe

ínÿenga ndoñe chamondëtsóyebuambnana;

<sup>40</sup> pero lempe šmochjama ntšamo jamama yomncá, y ndoñe nÿe ntšamo cada ona tojatsjuabnacá.

## 15

### *Cristo tojtanayenama*

<sup>1</sup> Morna, Jesucristbeyeca atšbe catšátanga, atše sëntseboše tšëngaftanga chašmuatenójuaboma atše tcbonjanabuayená tšabe noticiënguiñe, ndayá tšëngaftanga šmonjanóyëngacñe, chë ndáyeca tšëngaftanga Jesucristbeñe šmojtsošbuaché y cha jtserervénëse šmojtsiyena.

<sup>2</sup> Chca šmobómnayeca, tšëngaftanga atsebácanënga šmojtsemna, pero tšëngaftanga sempre chiñe šmojtsošbuachese, ntšamo cbonjanabuayiynacá; chca ndóñesna, nÿe ndoñe corente tšabá ntjajuaboycá chë buayenana soyënguiñe šmojtsanošbuaché.

<sup>3</sup> Er atše tšëngaftangbeñe sënjëftsanboshjona, Bëngbe Bëtsábiocana atše tijanóyëngacñe más uámana buatëmbana soyënga. Atše tcbonjabuatambá: Cristo tojanóbana bënga bacna soyënga tmojamama, ntšamo Bëngbe Bëtsabe uabemana palabrenguiñe chabe juabna oyebuambnayënga chama tmojanayancá;

<sup>4</sup> chë Cristo tmojanatbontsá y unga tianoye cha cháuatayenama Bëngbe Bëtsá tojanmama, ntšamo Bëngbe Bëtsabe uabemana palabrenguiñe chabe juabna oyebuambnayënga chama tmojanayancá;

<sup>5</sup> chë Pédrëbioye tbojánebëbocnama, y chentšana chë bnëtsana útata ca uabobáinëngbioynaca.

6 Chentšana mo shachna patsama más chábeñe ošbuáchiyënga tojánëbëbuacna, chënga cánÿentše imojtsemna ora; chënguentsanga banga cabá vida imotsóbomñe, masque báseftanga ya tmojóbana.

7 Chentšana Santiágbioye tbojánëbëbocna, y chentšana nyetsca chabe ichmónëngbioye.

8 Y chentšana átšnaca šonjánëbëbocna. Mo canÿe šešona cabá shbená tojonÿnacá, Cristo chabe ichmoná šonjánbema, chë tempo chama jopróntama ntsebomncá, ndayëntscuana ínÿenga cha tojanabuatambá.

9 Er atše sëndmëna chë más batšá uamaná Jesucristbe ichmónëngbeñe; y ni merecido taitsatobuajoñe “chabe ichmoná ca” chašmotsábobuatmama, er atše tša sënjánama Jesucristbeñe ošbuáchiyënga chamotsesufrínama.

10 Pero Bëngbe Bëtsá atšbe tšabiama yojanjuabná, y chíyeca atše mora tsmëna ntšamo sëndmëncá, y chabe tšabe juábnaca atšbiama jtsamana, ndoñe nÿe bonamente quenátsmëna. Er atše más sënjatrabajá, chë inÿe Jesucristbe ichmónëngbiama; pero ndegombre atše ndoñe nÿe canÿa chca chiyatsma, sinó masna Bëngbe Bëtsá chë trabajo tojama, tšabe juabna atšbiama jtsebomnëse.

11 Ndayá más yojtsámana ndoñe quenátsmëna, atše o chënga, Jesucristbe soyëngama abuayiy-nayiñe más tojatrabajá, sinó ndayá chë soyënga bëngbe buayenana soye yojtsemna, y tšëngaftanga chiñe šmojtsošbuaché.

*Chë obanënga cachiñe vida mochtsatsbomnama*



12 Pero bēngbe buayenana soye endmēna, Bēngbe Bētsá tojanma Cristo cháuatayenama; as ģndáyeca básefta tšēngaftanga šmnétsichamo Bēngbe Bētsá ndoñe yochanjama chē mora obanēnga chámuatayenama ca?

13 Pero chca tojtsemna, chē obanēnga ndoñe mochántayenasna, Cristo cach ndoñe tontanayena;

14 y Cristo ndoñe matenjésayenēse, bēnga nýe bonamente chabiamá fstsabuayiyná, y tšēngaftanga nýe bonamente chábeñe šmojtsošbuaché.

15 Y canýe más bēts soye: chca tojtsemnēsna, bēnga muanjáocna mo chē Bēngbe Bētsabiamá soyēnga tmojinýe ca ichamēngcá, pero ndoñe ndegombre chca tontsemna; er bēnga fsēndbētsichamo, Cristo cháuatayenama Bēngbe Bētsá tojanma ca. Pero chē obanēnga ndoñe mochántayenasna, Bēngbe Bētsá ndoñe tonjanma Cristo cháuatayenama.

16 Pero chē obanēnga ndoñe mochántayenasna, Cristo cach ndoñe tontanayena.

17 Y Cristo cháuatayenama Bēngbe Bētsá ndoñe matēnjanmēse, tšēngaftanga nýe tondayama chábeñe šmojtsošbuaché; tšēngaftanga chē bacna soyēngama cabá ndoñe perdonánēnga šmontsemna.

18 Y chca, chē tmojanóbanēnga, Crístbeñe ošbuáchiyēnga, chēnga cach ndoñe chēngbe bacna soyēnguentšana atsebácanēnga quemochátsmēna, sinó nýetsca tescama castigánēnga.

19 Bēnga tmojtsobátmana Cristo bēngbiama tšabe soyēnga chaotsamama, pero chca nýe quem luar-entše bēnga vida tmojtsebomnēntscuana, as bēnga

n̄yetscangbiamá más muantsomerecena, n̄yetscanga b̄ngbiamá chaotsangm̄enamá.

<sup>20</sup> Pero chca ndoñe ndegombre quenátsm̄ena, er ndegombre B̄ngbe B̄tsá tojanma Cristo cháuatayenama. Mo ch̄e uanatsena shajuancá, jtsin̄yan̄nayana más shajuan̄nga chentšana yochjóbocnama, cachcá, Cristo tojtanayena ora, cha tojanin̄yan̄yé B̄ngbe B̄tsá yochjanma ín̄yenga chábeñe ošbuáchiȳnga chámuatayenama vida chamotsatsbomnama.

<sup>21</sup> Chca, ndayá can̄ye entšá, Adán, tojanmama, n̄yetscanga jóbana yojtsamna, cachcá, ntšamo in̄ye entšá, Cristo, tojanmama, B̄ngbe B̄tsá yochjama entšanga chámuatayenama.

<sup>22</sup> Er ntšamo, Adánbentšana entšanga b̄tsemnayeca jóbana yojtsamna, cachcá, Crístbeñe ošbuáchiȳnga b̄tsemnayeca, B̄ngbe B̄tsá jamana ch̄e n̄yetsca tescama yomna tšabe vida ch̄enga chamotsebomnama.

<sup>23</sup> Pero B̄ngbe B̄tsá jamana cada ona cháuatayenama n̄ya chama tempo tojtsemna ora. Natsana Cristo, y chentšana, Cristo cachiñe quem luaroye chaojésabo ora, n̄yetscanga ch̄e Crístbe entšanga imomn̄nga.

<sup>24</sup> Y chentšana, B̄ngbe B̄tsá ch̄e Taitábioye, Cristo chabe am̄endayana chabojantšabuaché ora, n̄yetsca mandad̄nga, mando y obenana bomn̄nga corente jtsaȳnjanaȳse.

<sup>25</sup> Er Cristo bontsemna ín̄yenga mo reycá jtsam̄endayana, chabe uayaȳnga chabe cucuatšif̄ne chamoquedama B̄ngbe B̄tsá tojam̄entscuana.

<sup>26</sup> Can̄ye uayayá in̄étsama entšanga jóbana; pero Cristo último echanjama chabe obenana

pronto chaotsopochocama.

<sup>27</sup> Er ntšamo Bëngbe Bëtsabe uabemana palabrenguiñe endayancá: “Bëngbe Bëtsá tojama Cristo nyetsca soyënguiñe chaotsemándama ca.” Pero “tojama Cristo nyetsca soyënguiñe chaotsemándama ca” tojayana ora, jtsopodénana puerte tšabá jinýama, chca ndoñe yontsayana, Bëngbe Bëtsá Cristbeyeca mandaná yojtsemna ca; Bëngbe Bëtsá nda tojanma Cristo nyetsca soyënguiñe chaotsemándama.

<sup>28</sup> Y Cristo nyetsca soyënguiñe chaojtsemánda ora, cach Cristo, chë Uaquiñá, echántsemna Bëngbe Bëtsábeyeca mandaná, Bëngbe Bëtsá chë Cristo nyetsca soyënguiñe chaotsemándama tojanmá. Y chca, Bëngbe Bëtsá lempe echántsemna, lempe ntšamo quem luarentše yobínýniñe.

<sup>29</sup> Inyetsánaca, báseftanga cachiñe uabáinënga imojtsemna, chë ošbuáchiyënga nduabáinënga obanëngbe cuenta. Chca chënga jamana mo chë obanënga uabáinënga chamotsemnama cuafjamcá. Chë obanënga chámuatayenama ndoñe tontsemnëse, ¿ndáyeca entšanga chëngbe cuenta muantenábaye?

<sup>30</sup> Obanënga chámuatayenama Bëngbe Bëtsá ndoñe tonjamëse, ¿ndáyeca bënga muántseprontana nyets tempo resjuiñe jtsajnama, Cristbiana oservena causa?

<sup>31</sup> Atšbiana cada te resjo endmëna jóbanama. Jesucristbeyeca atšbe catšátanga, atše séntsichamo, chca ndegombre yómnyeyeca, atše oyejuayá stsemna ca, mo Cristo Jesús Bëngbe Utabnabe canye oservenacá, tšëngaftanga chábeñe šmojtsošbuáchema.

<sup>32</sup> Mo canya tšátjaye bayëngaca tojtsentsjaná orcá, atšbiana puerte resjo enjamna jóbanama, Efeso puebloca; pero nÿe chë entsanga mondbétsejuabnaye jëftsashjáchama soyënga jtsebošëse chca matsjammëse, ¿ndaye tšabe soye matëñjanóbocna, chca atšbiana resjo jóbanama enjamna ora? Obanënga ndoñe mochántayenësna, mochtsama ntšamo entsanga jayanana monduamancá: “¡Mochjase y mochjofsiye, nderado yëfse muatjóbana ca!”

<sup>33</sup> Ndoñe matenoíngñana. Ntšamo canya tojanayancá: “Nderado nda bacna amiguëngaftaca tojtsenutaná, cha jtsajbanana chë tšabe soyënga, ntšamo jtsamëse vojjoyena.”

<sup>34</sup> Tšabá šmochtenójuaboye, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayena ca juabnaye causa, er báseftanga tšëngaftanguentše Bëngbe Bëtsabe soyënga ndoñe quešmatábuatma. Atše chca sëntsichamo tšëngaftanga chašmotsëuatjama.

### *Ntšamo chë obanënga mochtayena*

<sup>35</sup> Pero nderado nda nanjatjaye: “¿Ntšamo chë obanënga mochtayena ca? ¿Mocna cuerpo mochtsebomna ca?”

<sup>36</sup> ¡Juabna ndbomna entsá! Ndayá tcojajé orna, jtseytana chë jénaye chaóbanama, chë matatema vida chaotsebomnama.

<sup>37</sup> Ndayá tcojajecá ndoñe ntsemnana chë juábocnama matatema, ndayá nÿe chë meshe, trigo meshe o ndaye mata méshnaca jtsemnana.

<sup>38</sup> Pero Bëngbe Bëtsá jamana chë jénayentsána mata chauábocnama, ntšamo jamama cha tojajuabocá; y cha jamana cada jénayentsána canÿe mata chauábocnama, ntšamo chë jénayentsána chauábocnama tojtsemncá.

<sup>39</sup> Nÿetsca cuerpënga ndoñe cachcá ntsemnana. Entšanga canÿe cuerpo mondbomna, bayënga inÿe cuerpo, shloftšënga inÿe cuerpo, y beongna inÿe cuerpo.

<sup>40</sup> Chë celoca vida bomnënga inÿetsá jtsinÿnana, y chë quem luarentše vida bomnëngna inÿetsá. Pero chë buashinÿinÿanana y botamanana ntšamo celoca vida bomnënga jtsinÿnancá, ndoñe cachcá ntsemnana chë quem luarentše vida bomnëngbe botamanancá.

<sup>41</sup> Cachcá, shinÿe ndoñe quenátsbomna cachca buashinÿinÿana juashconcá, ni estrellëngcá; y estrellënguentše cach ndoñe cachcá ntsebuashinÿinÿanana.

<sup>42</sup> Cachcá, chë obanënga chámuatayenama Bëngbe Bëtsá chaojama ora chamojtsebomna cuerpo, ndoñe queochátsmëna cachcá ntšamo quem luarentše imojaniyena ora imojëftsebomna cuerpcá. Ntšamo chë jénaye tcojuatbontsá ora chiye jóbanana, cachcá, quem luarentše bënga mondbomna cuerpo jóbanana, inÿënga juatbontsana y jtsopochócana; pero bënga chámuatayenama Bëngbe Bëtsá chaojama ora, bënga tsëm cuerpo mochántsatsbomna y ndocna te queochatopochóca.

<sup>43</sup> Chë óbana cuerpo tmojuatbontsá ora, chë cuerpo tondaye ntsámanana; pero chë obanënga chámuatayenama Bëngbe Bëtsá chaojama ora,

chë tsëm cuerpo puerte echántsebuashinÿinÿana y echantsámána. Bënga quem luarentše imoyenëntscuana imobomna cuerpo, nÿe batsá obenana jtsebomnana; pero chë Bëngbe Bëtsá šochjatšataye tsëm cuerpo, puerte obenana bomna cuerpo echántsemna.

<sup>44</sup> Quem luarentše imobomna cuerpo endmëna cam luarentše vida chaotsebomnama; pero bënga chámuatayenama chaojama ora, chë bënga mochtsebomna tsëm cuerpo, puerte chë Espíritbeyeca echántsemandana. Canÿe cuerpo quem luarentše vida chaotsebomnama yómnyeca, canÿe cuérpënaca, jtsemnana celoca vida chaotsebomnama.

<sup>45</sup> Chca Bëngbe Bëtsabe uabemana palabrënguiñe endayana: “Bëngbe Bëtsá, chë natsana entšá tbojanma chaotsainama ca.” Adánbentšana nÿetsca entšanga jabocanana, pero Crístbeyeca, Bëngbe Bëtsá tojama banga mo tsmëma entšangcá chamotsemnama; chca, Cristo jtsemnana mo chë ústonoye Adancá; pero Cristna canÿe espíritu endmëna, y chë espíritu jamana entšanga chë nÿetsca tescama yomna tšabe vida chamotsebomnama.

<sup>46</sup> Pero chë celoca nÿetsca tescama vida jtsebomnama cuerpna ndoñe natsana ntjóbochnana, ndayá chë quem luarentše vida jtsebomnama cuerpo; chentšana chë celoca vida jtsebomnama cuerpo.

<sup>47</sup> Bëngbe Bëtsá, chë natsana entšá tbojanma fshántseca, y chca, cha fshantsentšana tojánbochna; Cristna, mo entšangbentšana chë natsaná tsmacá bemanacá, celocana tojánbochna.

<sup>48</sup> Adánbentšana, chë natsana entšá, chë

fshántseca tmojanmábentšana tmojábocanënga, ntšamo cha yojamncá jtsemnana. Cachcá, chë mo tsmëmangcá tojábiamëngna, Cristcá jtsemnana; Cristo nda celocana tojánabo.

49 Ntšamo bënga jtsinÿnana chë Bëngbe Bëtsá fshántseca tbojánbema entsacá, cachcá bëngnaca mochtsinÿna ntšamo chë celocá yomnacá.

50 Jesucristbeyeca atšbe catsátanga, atše cbochjáuyana, nÿe quem luarentše vida jtsebomnama cuerpëngaca, bënga ndoñe ntsoberenana Bëngbe Bëtsabe amëndayoye jamashënguana; ni ndayá yochjopochóca soye, ntsoberenana ndayá ndoñe yochanjopochóca soye jtsebomnana.

51 Smochjouena, atše canÿe soye cbochanjáuyana, y chë soye Bëngbe Bëtsá entsanga tempo ndoñe tonjaninÿanÿé: Bënga ošbuáchiyënga nÿetscanga ndoñe quemochatóbana, pero Bëngbe Bëtsá šochanjátrocaye mo tsmëmangcá.

52 Nÿe betesco, mo tcojofshetá y cachora tcojtafsnacá, quem luare ya jopochócama ora, canÿe ángel trompetëfjua chaojuájetëta ora, er chora trompetëfjua echanjuénana, Bëngbe Bëtsá echanjama obanënga chámuatayenama, nÿetsca tescama vida jtsebomnama; y bënga, chë ainënga mochtsemnëngna, cha šochanjátrocaye mo tsmëmangcá jtsemnana;

53 er jtseytana Bëngbe Bëtsá chaotrocá chë bëngbeñe jopochócama yomna soye, ndocna te yochanjopochóca soyiñe; y ndayá bëngbeñe yochjóbana soye, ndocna te yochanjóbana soyiñe.

54 Bëngbe Bëtsá chca bëngaftaca chaojama

ora, chë cha jatrócana ndayá bëngbeñe yochjopochocacá, ndocna te yochanjopochóca soyiñe, y ndayá bëngbeñe yochjobancá, ndocna te yochanjóbana soyiñe, chora echanjochnëngo ntšamo Bëngbe Bëtsabe uabemana palabrënguñe chama endayancá:

Bëngbe Bëtsá tojayënjaná chë entsanga chamóbanama endbëtsama obenana; entsanga ndoñe más quemochatóbana ca.

<sup>55</sup> ¡Mora entsanga chamuatóbanama chaotsama obenana ya ndoñe quenátsmëna;

Bëngbe Bëtsá chë obenana nyetsca tescama tojayënjaná ca!

<sup>56</sup> Entsanga bacna soyënga tmojama causa, obenana endmëna entsanga jóbana chaotsamnana. Ndayá leyiñe iuayanama, entsá jtsetatšëmbuana ndayá yomna bacna soyënga jamana, y chca tátšëmbo causa, chca bacna soyënga jamama juabnëngaca mandaná jtsemnana, y cabana, jóbana jtsemnana.

<sup>57</sup> ¡Pero Bëngbe Bëtsá mochtsatschuanaye, bënga mo ayënjanayëngcá cha šojábiamama, er ya ndoñe šontsamna chca jtsemnana, chë Bëngbe Utabná Jesucristo bëngbiam tojanma sóyeca!

<sup>58</sup> Chíyeca, Jesucristbeyeca atšbe catšátanga, atšbe bonshánënga, Jesucristbeñe sempre puerte šmochtsošbuáchiye y ndocna te šmatjaleséncia ndocná ni tondaye chaotsama chábeñe ošbuáchiyana chašmotsajbanama. Sempre šmochtsentšena bëtscá jtsamana Bëngbe Utabnabiam trabájayiñe, er tšëngaftanga šmondétatšëmbo, Bëngbe Utabnabiam



trabájayiñe ndayá šmojamcá, ndocna te nýe bonamente ntsemnana.

## 16

### *Jerusalenoca ošbuáchiyëngbiama crocenánama*

<sup>1</sup> Mora chanjóyebuambaye chë Jerusalenoca Bëngbe Bëtsabe entsanga ndbonnëjémëngbiama tšëngaftanga šmochjuíchmua crocenánama. Atše sëntseboše tšëngaftanga chca chašmoma ntšamo chë Galacia luaroca ošbuachiyëngcá enefjuanenache chama atše sënjanabuayenacá.

<sup>2</sup> Cada tmengo, cmontsamna batšá crocénana jaluárana ntšamo chë semaniñe šmojonýencá, y šmochtsejuabaye; chca atše choye chajjá ora, ndoñe chacmondétsamna quem uajabótama chora crocénana játatbanayana.

<sup>3</sup> Y atše choye chajjáshjango ora, Jerusalenoye chjichamuá chë tšëngaftanga mo tšabengcá šmojubuáyana entsanga, chë Jerusalenoca ošbuachiyëngbioye tšëngaftangbe crocénana chámuayentšbuachema, y tsbuanachangá chanjúyentšbuachiye ndayá imojtsamama chënga jábuayenama.

<sup>4</sup> Y nderado, átsnaca chëngaftaca jama tšabá tojtsemnëse, chënga átšeftaca chamua.

### *Ntšamo Pablo yojanjuabná chë luarëngoye jama*

<sup>5</sup> Atše sëntsejuabná tšëngaftangbioye jama jautsëtsayama, Macedonia luarëjana chajachnëngüentsana, chentša ošbuáchiyënga jaftsanyëse, er atše sëntsejuabná natsana Macedonia luaroye jëftsana.

6 Nderado baseftayté tšëngaftangbeñe chašuéťsetetana, o nderádose nyets uaftena tempo; as tšëngaftanga inye luaroye játama chašmuájabuachama, ndémoye jama chašojtsemnoye.

7 Atše ndoñe quetsátsboše nje betesco tšëngaftanga jáftsanýana, er atše sentsobátmana más bayté tšëngaftangbeñe jaftsemnana, Bëngbe Utabná chca šojalesenciase.

8 Pero Efesoca šochanjajétana Pentecostés fiesta chaojobuáchëntscuana.

9 Er Bëngbe Bëtsá tojama atše jobenayama muentše chë tšabe noticiëngama banga jábuayenama, y chíyeca banga Crístbeñe montsošbuaché; pero bángnaca atšbe contra montsemna.

10 Timoteo tšëngaftangbioye chaojase, yejuana šmochtsantješna cha tondayama chaondëtsauatjama, tšëngaftangbeñe tojtsemnëntscuana, er cha Bëngbe Utabnabiamana endëtrabája, ntšamo atše sëndamcá.

11 Chcasna, ndocná chábioye chabondëtsáboyënja. Bëtscá šmochjama cha natjëmbana átšbioye chauatábama, er atše cha sentsobátmana, chë ínýenga muentše Crístbeñe ošbuáchiyëngaftaca.

12 Y Jesucrístbeyeca bëngbe catšata Apólosna, atše bëtscá cha sënjaimpadá, chë Jesucrístbeyeca catšátanga tšëngaftanga jányama mochjángaftaca chaotsama, pero cha ndoñe chenátsbošena choye mora jama. Cha choye caochjá, chaojobená ora ca.

*Pablo chënga jtadióšoftanama*

13 Sempre šmochtsenocuedana chë Bëngbe Utabná ndoñe chašmondëtseservenama tojtsama soyëngama. Nyëts tempo, Crístbeñe y chabe soyënguíñnaca šmochtsošbuáchiye. Ainaniñe puerte añemo šmochtsebomna, y bëtscá šmochtsama Bëngbe Bëtsabe obenánaca.

14 Y nyëtsca soyënga ntšamo chašmojtsamcá, bonshanánaca šmochtsama.

15 Jesucrístbeyeca atšbe catšátanga, tšëngaftanga šmondëtatšëmbo, Estéfanas y chabe pamíllanga chë natsanënga monjamnama Jesucrístbeñe jtsošbuáchiyama, Acaya luaroca, y bëtscá imojtsentšena Bëngbe Utabnabiamama jtsetrabájayana, chabe entšanga jtsëjabuáchanëse.

16 Atše cbaimpadá, tšëngaftanga lempe šmochtsama ntšamo cmojtsamëndacá, chca entšanga mo tšëngaftangbe uanatsanëngcá, y ntšamo nyëtsca chë ínÿenga mo bëngcá quemuiñe uajabuáchanëse trabájayënga cmojtsamëndacá.

17 Atše tša oyejuayá sëntsemna tšëngaftangbe pueblentšana Estéfanas, Fortunato y Acaico moye tmojáshjajnama, er atše sëntsobena oyejuayá chëngaftaca jtsemnana, tšëngaftangaftaca choca jtsemnana cabá ndoñe sëntsobenëntscuana.

18 Er chënga átšbioye tmonjabo y tšëngaftangbiamama šmonjauyana, y chca chënga tmonjama, atše y tšëngaftanga natjëmbana ainánaca chamotsomñama. Chënga šmochtsétabna mo puerte uámana entšangcá.

19 Asia luaroca ošbuachiyëngcá enefjuanënga cmontsacheuaná. Aquila y Prisca y chatbe yebnentše mondbétsenefjuana ošbuáchiyënga

cmontsacheuaná, Bëngbe Utabnábeñe  
ošbuachiyëngcá, tšëngaftangcá bétsemnayeca.

<sup>20</sup> Muentša ošbuáchiyënga nÿetscanga  
cmontsacheuaná. Nÿetscanga šmochjenchuaye  
mo Jesucrístbeyeca catšatangcá, jtenámochëse,  
ntšamo cach tšëngaftangbe pamíllanga puerte  
bonshanánaca šmondsetsacheuanaycá.

<sup>21</sup> Quem palabrënga tšëngaftanga jacheuayama  
cach atšbe cucuátšeca sentsabiamná.

<sup>22</sup> Nderado nda Bëngbe Utabnábioye ndoñe  
tbontsebobonshana, Bëngbe Bëtsá nÿetsca tescama  
chabocastigá. ¡Bëngbe Utabná cachiñe cochjésabo!

<sup>23</sup> Atše, Bëngbe Bëtsá sëntseimpadana, Bëngbe  
Utabná Jesús chaoma tšëngaftangbeñe tšabe bendi-  
cionënga chaotsemnama.

<sup>24</sup> Atše, nÿetsca tšëngaftanga  
cbondábabuanÿeshana, canÿa mo tšëngaftangcá,  
Cristo Jesúseftaca cánÿiñe mo canÿacá jtsemnëse.

## **Bëngbe Bëtsa Cabëngaftaca Entsoyebuambna New Testament in Camsá**

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Camsá

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files  
dated 29 Jan 2022  
19104c0e-9046-5ff3-82fb-eb838c88dcf9